

西北革命史徵

弁言

本會編纂西北革命史徵已及兩年中因編纂主任王陸一先生患病彌年以致工作無形停

近承

于院長指示准先暫編初稿呈候核閱如有未盡再行修改頃由同人先將辛亥紀事一目整理編次現已脫稿排印成冊

辛亥迄今時逾卅載晨星寥落文獻無徵幾經採集僅得概略舛訛疎漏所在必多惟念先河後海有待衆流引玉投磚即須哲匠除寄呈于院長核閱外凡屬當日有關諸君應各檢送一冊尙祈察閱指正一切母任感荷

陝西革命先烈褒卹委員會編次

中華民國三十三年五

月

西北革命史徵編述要目

第一 著論

第二 辛亥革命紀事

總述

秘密運動時期

發動時期

始義情形

軍政建置

戰守紀要

人物紀傳

文獻彙存

第三 二次革命紀事

總述

第四 討袁護國之役紀事

總述

先烈紀傳

第五 陝西靖國軍紀事

概述

軍政軍制紀要

戰守紀要

政治建設紀要

先烈紀傳

文獻彙存

第六 首都革命紀事

總述

秘密運動情形

發動情形

戰守紀要

人物紀傳

第七 長安圍城及解圍紀事

總述

圍城紀要

解圍紀要

陝西底定後之革命軍事政治

第八 大事紀

第九 附錄

西北革命史徵要目

西北革命史徵

第一 著論

中國國民革命之興起其成爲此時期之社會主要思潮與發動此革命之主要力量者南北地區各有其因素而共向三民主義建國及建設新世界之大道邁進在珠江流域省分值太平天國革命運動失敗之後流風糜烈猶影響於民間雖金田旗鼓已銷歇於頑梗之衣冠而嶺海夷傷仍指點爲沉默之傳說外則帝國主義之侵略使人民生活情狀起絕大變革其由農村經濟破壞迫而遠涉海外者或則盡歷諸殖民地之殘虐或則憧憬於民主之治或則深察遠想知社會存伏之危機民生困窮鬥爭必起生產形式已至窮則必變之時凡此原因必將鎔鍊爲主張創造成時勢

總理應運挺生所倡導之主義所決定之革命策略其爲歷史使命與地理環境之真實曠時代而不容疑者也至於黃河流域民族之意識故國之眷瞻二百餘年來遺民孤忠長在天壤空山零雨以經術相傳授粹保志行並研究水利農田倉儲墾牧諸學爲經世之用而不沾洩於當世功名北方之學所用精微翔實者蓋義理之審辨深則夷夏之周訪謹生民之利病切則庶政之設想不廢且異族虐政之下非復明夷待訪之年而今日之山河非皇漢塊滯之舊今日之文物非先民締造之遺人民憔悴呻吟屏焉而蓋勢已絕不可久又自英法聯軍及八國聯軍進犯以來彼專制政府對外則失地喪師馴順受命對內則驕頑壓迫益絕人民之生機而成爲國家求自救自立之絕大障礙當是之時舍革命外無他途北方人民益駭駭起矣雷霆奮發南北相應故其時雖主義之傳導未週行動之紀律未一而咸知此事之不容已即亦各忠其所知各盡其所安各就一地方之力從事革命所謂先爲天下作驅除仁者見

其仁智者見其智此亦革命必有之經歷也主義之推行與成就非有此經過不爲功夫革命固爲一科學之事而當其爆發之初智力之不齊人事之不臧顧未嘗深思密計往往悉凌厲動亂之能事以出之若其反於科學條理者其實此種鹵莽衝突現象蓄之既久實反映社會內情之不安認舊現狀既毋須保持即大破壞不暇抉擇正革命所以必發生之故也在大破壞中隨而發現何者仍當保留何者且當建設之新條理然後革命行動與其力量乃漸麗於革命主義之所要求斯亦仍合於科學之觀察也革命發生後一切事態發展在不斷進步中亦不斷使革命之領導歸於充實革命爲無前例之事其策略亦隨情勢而推移此革命大業中之甘苦吾人苟非欲倖炫天功固當黯黯回憶承認此事實也故中國革命發生並發展於若干不同之地區方法形式諸不盡同而惟主義之趨向有歷史之命定有時代之指示信仰無殊目的共赴以卒底於成功之域故殊不能以方域之見只認革命之一巨流而泯却發生革命之全面意義其形勢較細客觀條件較艱苦之他一地區凡其事之所能至皆其力之所已盡志士仁人之苦鬥犧牲尺寸寸天之殫精區畫山川夔隔風氣罕聞然成其爲革命策源地在整個革命運動中之效獻固炳然長在也前事不忘所貴乎史無闕文抑一切不獲已之事實不可再之教訓不必要之殘傷不忍諱之闕憾以檢討革命事業之用心比事而屬辭知人而論世則知成毀之迹相需相應之效有以明作始之簡而將畢之巨造端乎一方面而同功乎天下

今日去辛亥革命已三十年始欲敘次經過爲他日史事之徵故首當申言此項工作之意義夫關係國家民族之一大事與若干人生命心力之所注自辛亥而討袁護國護法尤以陝西靖國軍之展現爲西北革命同志乃至全北方革命同志死生患難之所經營以一隅之地當六省之兵歷五年之久崑崙之山黃河之水百戰千萬戰人一人安可使光滅景絕顧大風鄉里寂然哉當時經制軍政建樹文物

規模燦然不以危迫在瞻憂爲辛苦之籌爲在今日見開創之謨則斯更不能不及時續載也吾人固謂陝西爲中國西北乃至北方革命之策源地亦北方革命同志集獻心力之地遠應天南共荷神聖之使命事具可徵文惟求信載茲之始謹述論云

第一 革命軍命記事

總述

自甲午庚子兩戰役後國人深知滿清政府之腐敗專制不足代表國家與並世文明各國相頡頏
總理孫中山先生乘時首出創立同盟會於日本東京號召同志大倡革命排滿之說於是賢哲宏
識英銳有志之士同受革命學說之洗禮奔走聯絡大事運動革命書報如總理小傳鐵券民報回天手
段諸書輸入內地輾轉傳閱感動激發民族革命思想益深滲入於青年學生暨各階層人士之腦髓心
靈當時西北人士親承 總理革命主持革命工作爲有次第之進行者首推于先生右任及井先生勿
幕一時加入同盟者如張君拜雲吳君寶三張君東白景君梅九李君岐山李君仲特李君栢軒王君子
瑞熊君子靜郭君希仁陳君惠亭劉君介夫曹君向侯尚君殿特趙君勝浮茹君卓亭李君子逸井君崧
生張君翔初劉君允承楊君西堂常君銘卿胡君笠僧師君子敬曹君俊夫李君仲三柏君筱餘鄒君子
良高君又明王君治平宋君相臣樊君靈山胡君定伯任君師竹薛君卜五馬君開臣王君紹文賀君紱
之康君寄遙劉君藹如焦君易堂張君熙若郭君自興于君海滄馬君彥獅楊君叔吉范君篤生李君襄
初嚴君文軒蔭君麟伯南君蘭軒姚君樹陔曹君雨亭紀君時若紀君子文華君孝康王君偉齋張君立
卿王君一山吳君希真雷君崑山嚴君敬齋楊君仁禾方君厚庵張君伯英錢君定三党君自新曹君建
安彭君仲翔耿君季儒張君仲仁牛君策勳張君聚庭馬君彥若朱君叙五高君价人劉君潤民張君靖
清陳君殿卿劉君定五韋君協度郭君方剛田君彬臣紀君朗亭石君益齋楊君瑞亭程君島三郭君海
樓史君可軒王君振業張君仲良李君光如劉君少濂劉君芳初常君仙洲陰君潤之李君冠臣楊君鼎

臣甄君壽山馬君克齋張君身菴王君仲元孫君梅臣劉君荃生龍君現初馮君子明李君龍山于君鶴九程君星五李君養初劉君樂天曹君仲謙左君善楚李君秀等百餘人或以現職軍人或以搢紳先達或以在野名流或以承學士子或任學堂教授或聯各地游俠或密置武器或廣布新聞其他各界人士及青年學生風發雲合先後崛起於關隴之間如春草之怒茁初潮之澎湃磅礴鬱積待時思伸

哥老會者本故明遺老所創以圖反抗滿清恢復明朝爲宗旨者也其組織詳密規律謹嚴清代二百餘年其黨徒徧布全國中下各層社會成一有體系之潛在力量號召之力倍於恒人萬千其魁桀如張雲山萬炳南諸人夙多蟠窟於軍伍我革命黨人因得密與聯絡於是西北革命勢力由新舊各派合流爲一及武漢義旗一舉而三秦關輔遂於九月一日首先響應數日之間繫清吏破滿城掃除二百六十餘年之膾腥濁穢光復漢物樹立西北革命基礎與南北各省革命志士呼吸嚙應同建中華民國共和大業顧關隴當日僻在西北距東南各省窺遠其發難也驟其爲勢也孤雖光復之舉收功崇朝而清軍之抗義者於西則有清吏升允率甘回各軍由蘭州平涼建甌而下直逼乾州鳳翔於東則有豫軍毅軍各營日進以進薄潼關我三秦革命軍以新造單弱之衆當前後來攻之敵分頭迎戰搏鬥數月外

不授應門者無通內而餉械無源血肉相薄擲頭顱忍飢寒饜兵廣原之上忍死圍城之中氣壯河

不及焉夫當日始事諸人排衆議犯危難置身家性命一切於不顧而獨致力於排滿革命其間有死於戰場死於圍圍死於敵死於職死於道流亡死於憂勞疾病彼其人惟知忠於國家民族不暇有功利成敗之圖故能臨危授命義不反顧充其志氣之激發南山可礪黃河可帶白骨可成灰碧血可成塵而精神終不可屈撓迨後共和甫建賢智者流首先引退或杜門卻掃或解兵求學意謂光復既成自

當冠裳擢俎雍容謀議以求所謂長治久安之道志不復用兵革顧未幾而大盜竊國軍閥亂政各地黨人忠義奮發在總理領導之下攘袂投箸再接再厲百折不回遂相繼而有二次革命及討袁護國護法靖國與夫首都革命西安圍城諸役迄於北伐勝利國民政府統一成功而止

由前言之則辛亥以前爲因而辛亥爲果由後言之則辛亥爲因而後次諸役爲果事本一貫途非多歧地非一隅人非一省實皆懸一革命建國之共同鵠的奉總理三民主義以爲周旋趨而赴之毫無猶豫者也夫豈囿於西北一隅之見哉

秘密運動時期

民國紀元前五年（清光緒三十二年）張君拜雲吳君寶三等以地方士紳聯名上書郵傳部爭西潼鐵路改歸商辦不得知非推翻滿清政府不足救國首倡文化運動以爲革命入手方法又以官立各學校監視極嚴乃聯合焦君子靜王君子端數十人創設健本小學於西安藉以培養革命人材又與焦君合資開設公益書局秘密購運革命書籍並購印刷機器添設公益印字館印刷書報宣傳革命思想言論而鄒君子良亦創辦女子小學於省城西嶽廟同時郭君希仁復倡立麗澤館聲鐸社聯合同志到處演說號爲開通民智實皆黨人聚會接洽之秘密機關也

民國紀元前四年（清光緒三十三年）黨人李桐軒陳會亭常銘卿等同任蒲城高等小學堂教員並在蒲城組設教育分會以常銘卿爲會長楊鶴鳴爲副會長常川住會者有庶務員常仙洲書記員雷季陽演說員寇孝庭劉芳初平議員井崧生原振之劉荃生諸人明倡天足興學戒煙息訟密結草野志士進行革命工作密謀先由渭北發難誘致省軍出城乘機在西安起義逾年九月初一日縣城關帝

廟湖神演戲教育會同人在會場演說勸導婦女放足語涉滿漢種族問題有人從傍非議與在場學生爭論衝突頗劇紳士以學堂學生不守學規與人打架爲詞稟報縣署縣令李體仁以原稟送學堂傳閱營陳二君引咎辭職學生挽留不得全體搬入北街關帝廟組設自治公學李令遂將學堂封閉教育會以責任攸關未能坐視即於是日重陽之夜秘密開會決議暗殺勸學總董兼巡警總辦張某先解散官紳團體是夜井崧生潛伏巡警局外雷季陽率領學生十餘人衝入局內則見燈火輝煌當地痞棍多人正在聚賭見衆闖入驚爲抓賭者登時越牆亂竄季陽遂將巡丁四人及賭具拿獲由會具文解送縣署請求嚴懲李令覆一照會反謂教育會認賭着將與事之人送署詳察同人大憤覆文辯駁遂與李令水火李令窺同人之勢不相下也爲先發制人計以教育會鼓動學生圖謀不軌爲詞通稟撫按藩司各衙門奉批嚴拿查辦九月二十二日下午李令親率三班衙役分頭包圍學生及教育會立將會長常銘卿鎖拿由會內搜出總理小傳回天手段諸書並黨人往來函件李令復親至北廟公學鎖拿學生數十人歸署高坐堂皇嚴刑拷掠竟一日夜學生原斯健斃於杖下而陳君會亭等適於是日因事他出得免聞訊後星夜馳赴省垣報告省教育總會出與當道交涉並向省垣及外縣分頭呼援激動全省各學堂罷課風潮清吏見民氣激昂且懼于處分也因勉從張君拜雲言撤李令體仁職始已

辛亥以前革命機關之在西安者以健本學堂諮議局公益書局三處爲最著健本學堂王子端諸人主之公益書局焦子靜諸人主之諮議局郭希仁諸人主之各同志平時籌商一切悉於三處秘密舉行遇有重大事件須得多人決定者則另擇適當地點已酉（清宣統元年）冬在麗澤館開會一次到場者郭君希仁李君仲特景君梅九景君敬之陳君會亭鄒君子良王君子端馬君開臣焦君子靜師君子敬任君師竹王君一山耿君季儒等數十人公推李仲特爲同盟會分會長逾年庚戌郭君希仁與焦

君子靜鄒君子良李君襄初王君子端王君一山馬君彥紳等復於城南大雁塔開秘密會議推郭希仁爲同盟會陝西分會會長規劃革命進行方法西北革命組織愈形完密

民國紀元前二年（清宣統元年）黨人柏筱餘紀時若張立卿王治平紀子文等組設勸公社於三原購運書報雜誌及教育用品以提倡文化爲名而宋相臣樊靈山等亦在耀州之廟灣鎮組織牧羊廠以提倡畜牧爲名同爲當時秘密機關柏君筱餘以西北軍械之無來源也又出其家財五千金羅君少鴻亦出麥二百石助之使鄒君子良在宜君馬欄山創辦屯墾開鑛各事藉以容納各地黨人乘試造手溜彈又以五千金推張君熙若赴滬採購製造子彈器材因沿途稽查甚嚴無法起運乃改買黃色炸藥若干及宣傳革命書籍若干偕同嚴君敬齋運歸由高君又明學製炸彈及辛亥西北首義與甘軍戰於乾禮間甘軍不能長驅直進此炸彈之威力居多

辛亥（清宣統三年）春柏君南遊滬漢道出洛陽見其地所製刀矛甚精因購馬刀千把鋼矛千把乘夜檢閱之料以提倡武術爲名運歸分存三原耀州各他九月西安起義時耀州藥王山集合之民軍皆持武備多數皆此物也

三原朱佛光先生關中宿儒也平居講讀古籍不主故常對於歷史事蹟往往提示種族關係隱寓激發進之士聆其議論接其風采者皆深爲感動門下士參加革命運動者尤多故朱君雖不隸同盟會而辛亥以前之談革命者皆推朱君爲先進云

新軍同志初由錢定三張伯英党自新張聚庭曹建安諸人在省城南院門組織一武學社專售軍事書籍實爲諸同志秘密集會機關又於滿城內設一分社藉以探察旗營消息顧當時陝西新軍僅一混成協自成立後久爲巡撫恩壽之親信道員王毓江所把持引用私人政以賄成西北同志皆沉滯於

下僚末級不得升遷爲革命進行障礙彭君仲翔張君聚亭等聯絡軍界三十餘人揭王罪狀數十款託諮議局陳請恩撫查辦留中不發仲翔遂入京與陳君會亭馬君彥若等多方運動控王於陸軍部而諮議局郭希仁李仲特諸人復援周章達王毓江與恩撫表裏爲奸狀於資政院乃得撤王督練公所總辦職並其黨羽十餘人而以毛致堂徐梅生代之毛徐二人反王所爲與陝人取聯絡於是張翔初以督練公所一等委員晉升協司令參軍官尋改參謀兼二標一營管帶張靖清擢遷二標教練官兼第三營管帶彭仲翔調督練公所二等科員錢定三張仲仁党自新曹建安陳柏生劉伯明張伯英張季芳范篤生張虎臣等皆以次遷調爲隊官排長翔初自任參謀後復查出王毓江之黨弊竇多端斥退若干人由是西北人士在軍界始大佔勢力而軍人加入革命團體者益多矣

關中各地游俠之盛遠自漢代龍門史記傳載極詳二千年來流風未息蒲富臨渭同朝二華各地所在皆有其羣類其人皆不學無遠大思想同類之間互爲仇隙糾衆械鬥每至數十百人革命同志知其徒衆可撫而用也井君崧生胡君榮曾君俊夫各就所在分頭結納開悟其愚蒙化除其私見而導之於革命之途辛亥之際得其力以從事於戰陣者良多

先是蒲富臨有王鶴亭者以私運烟茶稅餉官稅雄於一方招奪各地亡命爲黨羽甚衆駐華陰巡防隊以計誘而殺之其徒疑小泉（後改名飛龍）代長其曹清史偵捕甚急小泉深匿不出非其徒罕與外人接黨人李仲三變儒服爲江湖游俠裝自西安徒步至朝邑得其徒之在獄者深與交結得悉小泉所在地遂時復往遊於朝邑屬之北柿千村小泉疑爲巡防隊之偵已者使其徒縛而鞭之既絕復蘇者再置網二十餘日仲三之母往也道經同州師範學堂與寇君勝浮尙君殿特（寇任師範學堂教務尙爲校長）洽達十日不還則必有他變至期果不返勝浮乃親赴朝邑覓人使達於小泉始信而禮釋之將

別告之曰他日苟有事者吾屬敬以二千人聽命矣故辛亥河東之役下運城與毅軍戰於閩鄉靈寶間嚴飛龍一軍稱勁旅焉

庚戌（清宣統二年）井君勿莖銜總理密命由滬歸陝言東南各同志以歷年舉事失敗之由非但謀畫未周亦因東南交通便利事機極易敗露欲變方針改從西北着手比較穩妥因與宋相臣鄒子良等十餘人開會於柏筱餘家花園之水榭亭居留二十餘日草擬會章及黨人通訊方法問答術語兼與西安各界同志切實聯絡革命工作方歸一致進行愈急

是年六月初三日同盟會黨人及哥老會首領秘密開會於省城南郊之小雁塔與會者爲井勿莖張伯英錢定三胡筭僧鄒子良李仲三張聚庭馬開臣党子新張仲仁張雲山萬炳南王榮鎮陳樹發朱福勝馬玉貴馬福祥劉世傑郭金鐘陳殿卿劉剛才朱漢庭張玉成曹建安郭勝清張建友陳素子吳世昌李漢章陳得貴朱叙五劉仰明李長蘭吳長世邱彥彪薛建侯等共三十六人號三十六弟兄歃血爲盟共圖大舉

發動時間

辛亥（清宣統三年）秋八月武昌起義之前陝新軍中先有風傳八月十五日舉事之說及十九日武昌事發之後郵電機關均爲官場統制外來消息不通但聞西安滿將軍文瑞連日調撥旗兵分守四城及滿城各門並定日在舊皇城演操而黨人各方固已早得確信秘密集議決於九月初一日晚由新軍首先發難各地應之新軍諸同志平日稱服張翔初之膽略推爲首領而翔初適於此時率全營赴臨潼打野操三十日始歸諸同志即告以密謀時期翔初慨然從之並謂既已決定則事宜從速不可再

延時刻遂於夜半集合各同志在操場會議進行方法翌晨九時復在距營數里之林家墳開會公推翔初爲臨時統領錢定三爲參贊議決回營立時出發時先使張慶庭帶數十人收換便裝暗藏槍枝散布城內要地使黨自新張伯英叙五余永寬郭錦鏞等各帶馬步兵十餘人託領子藥爲名由南門入分兩路直趨軍裝局錢定三與張仲仁由西門入直趨陸軍中學堂收其槍械翔初與劉伯明整隊入城由西大街穿過爲奪軍裝局各部隊之應援各部隊於入城後秋毫無犯商市不驚甫到軍裝局門守兵即逃散隨將軍裝局佔領旋自咸寧縣獄中放出之獄囚及隨觀之市民以所取獲之槍枝任意演放聲徹市街人民咸知革命之事起矣

新軍入城之初除奪取軍裝局外僅佔領東西南三門滿城及北門尙爲滿清之旗兵抗守是日午後城東南隅忽發現旗騎兵數百來奪軍裝局翔初與張伯英率衆登陴擊卻之使錢定三帶兵駐鼓樓嚴防滿兵西出連夜佈置防務分派隊伍於五鼓進攻滿城至已正不能入翔初督衆由南面進張雲山率部自西面向北門進攻敵樓內所藏火藥被焚起火滿兵燒死者甚衆餘皆越城逃竄滿城始克西安城防至是悉歸黨軍掌握西北革命事業遂取得第一步之勝利

始義情形

革命軍既起一時無所取名而東南各省消息又不靈通惟聞道路相傳湖北義軍用湘豫鄂大統領名義乃仿其意稱秦隴復漢軍刊製木質關防出示告諭民衆倉卒之際鑒於設制郭希仁援筆立書十六字曰各省起義驅逐滿人上應天命下順人心衆皆服其敏捷而簡當

省垣既發難風聲所播外縣各地豪傑紛起響應者耀州胡笠僧白水曹俊夫蒲城岳西峯郭堅耿

直隸潼曹印侯同官姚振乾白華陰馬耀羣藍田楊茹林皆聚集當地豪俠同時並起駐潼關巡防隊統領胡明貴亦驅逐滿清官吏據城反正而哥老會黨徒之在外縣者一經號召遽起尤多如黃青雲之在長安余成龍王悅欽之在藍田劉松山牛春山之在商州黃金山之在臨潼陳坤山之在三原王悅德之在涇陽向紫山之在富平王金山之在興平崔丁海之在同州一時泉湧風發如銅山西崩洛鐘東應關中四十餘縣數日之間莫不義旗高揭矣

當初一日黨軍之入城也省諮議局適於是日開會滿清護理巡撫部院兼布政司錢能訓西安將軍文瑞暨各司道均蒞塲及槍聲作會敵各官吏皆倉皇竄匿滿城破後文瑞失蹤錢能訓於初六日經人搜獲初七日又搜獲按察司錫桐巡警道張藻提學使余堃諸人先後解送總部拘留省垣人心至是始定

軍政建置

滿城既克諸同人並於初三日就軍裝局集合組織臨時機關分理各項事務首組總司令部設參謀軍需會計三部推揚西堂王世濟主會計席子厚袁春波主軍需郭希仁王子端常銘卿任參謀楊開學編各學堂學生爲巡警隊維持市面宋相臣林即卿辦外交保護外僑王錫侯張衡玉組織民政府馬關生安謐回民兩軍亭經管驛站郵政張俊卿賈東園管理電報局劉楚材管理郵政局王一山點收藩署寶濟庫檔卷底册嚴敬齊梁成甫收管提學使署卷宗帳簿程島三保管古物陳列所曹引之保管石油工藝兩廠發售處鄧春亭保管西倉張某保管東倉移檄各州縣申明革命宗旨並派旅省學生分赴各外縣提倡鄉團防匪衛民西安城關各坊巷亦令設團自衛使焦子靜井崧生李襄初分赴渭北各縣

督辦民團招募游俠任李仲三爲東路招撫使收編嚴飛龍部衆張玉成爲西路招撫使張仲仁爲南路宣慰安撫招討使并勿幕爲北路宣慰安撫招討使曹建安爲西路節度使陳柏生爲東路節度使諸事規模於是粗定

初四日各將領聚會於軍裝局三層樓之小屋中議定起義諸人位號張翹初首辭大統領職經衆固留並表示一致服從旋提議舉副統領衆皆推錢定三會黨中人有推萬炳南者意見紛歧不歡而散初五日復會於督練公所萬炳南願曰爲大統領情見乎詞更有推某某爲兵馬元帥者有爭執任某都督者意見橫生感情幾至破裂張雲山充擴張軍實獨樹異幟勢不相下郭希仁乃邀彼黨中之明大者相與譬解百端並曉以晚近中外大勢暨古今英雄已往事跡幾經調停始獲定議仍推張翹初爲大統領錢定三萬炳南爲副統領張雲山爲調遣步馬砲工輜各標營隊總都督吳世昌副之劉世傑爲軍令大都督郭勝清副之馬玉貴爲總理糧餉兼管軍務大都督馬福祥副之並決定以張伯英爲東路征討大都督行營設潼關張雲山爲西路征討右翼大都督行營設乾州萬炳南爲西路征討左翼大都督行營設鳳翔由是各黨意見消釋號令乃歸一致矣茲更列其組織如下

秦隴復漢軍大統領 張翹初

副大統領 錢定三

副大統領 萬炳南

軍政府高等顧問 郭希仁

秘書長 茹卓亭

秘書 李子逸

參謀長 彭仲翔

軍政司長

軍需司長 惠春波

糧餉司長 張聚庭

民政司長

教育司長 張聚庭

兵馬大都督 張雲山

副都督 吳世昌

糧餉大都督 馬玉貴

副都督 馬福祥

軍令大都督 郭勝清

副都督 郭勝清

東路征討大都督 張伯英

副都督 郭金鏞

西路征討右翼大都督 萬炳南

副都督 吳世昌

西路征討左翼大都督 張雲山

西路招撫使 張玉成

副招撫使 任宏發

東路節度使 陳柏生

西路節度使 曹建安

南路宣慰安撫招討使 張仲仁

北路宣慰安撫招討使 井勿幕

敢死軍統領 曹印侯


湖北敢死軍旅長 王振海

軍中組織既定後，各部組織均設軍令、民政兩府及參謀處三部，旋合併民政政府參謀處為總務府，總辦軍民各事。內分參謀、參議、參議、參議及秘書廳、銓叙局，並改軍令府為軍政部，專理軍事，自是政務亦均就緒。茲列當時政務組織如左：

秦隴復漢軍

副大統領
副統領

錢定三
張炳南
萬炳南



戰守紀要

自省垣光復之信聞於各外州縣地方官吏多半效順惟潼關潼商道端清及駐防協台某因係滿人據城抗命並分向晉豫兩省請兵來援及初八日太原反正晉軍中道折回獨豫軍西進而潼關已有胡明貴十二日反正之舉豫軍於十三日抵潼關胡明貴率衆拒之戰於東原寡不敵衆兵敗身殉而省垣自初命錢定三率軍東守潼關行至渭南遇難後復命張伯英東出適渭南嚴紀鵬自以誤害定三惴惴不安來省請罪願以所部效命前驅立功自贖遂令王榮鎮率之隨同伯英東援潼關伯英又於沿途招納藍田楊茹林臨潼曹印侯各部衆比至渭南軍勢大振而潼關已陷遂進至華陰以未悉敵軍衆寡暫未交鋒並派人星夜至省請增援兵十九日張翹初親率陳殿卿一營自省赴援張雲山又調鄧占雲一營循南山出右側方井勿幕率所部自渭北沿河東下出左側方三路援兵尙未到達伯英即於二十日冒雨督戰開始攻敵連戰兩日直薄城下嚴紀鵬之衆均肉袒持白刃奮勇先登鄉民緣西南原聚觀者數萬人呼聲震動如雷豫軍大懼棄城潰退我軍遂收復潼關

潼關收復後伯英意在以攻爲守率衆東出先克閿鄉繼出函谷與敵相持靈寶間而趙佩率毅軍六營兵精器利雲湧而來我軍多係新招之衆未習戰爭更因收復潼關後將士未得休息致多不服調遣一經接火進退自由各不相顧旋即四散狂奔退過華陰幾乎不能收隊廿一日潼關遂復陷於毅軍省垣既聞東路敗信張翹初親帶衛隊數百人於二十二日黎明出發兼程前進是晚即到華州與伯英集合各營隊重整旗鼓二十四日復進駐華陰王榮鎮陳殿卿謝彩臣劉俊生陳樹發亦各相繼率隊至大軍雲集人心稍安二十五日翹初招集各標營會議諸人多以日前潼關之失歸咎伯英伯英慨

然曰強敵當前往事得失何暇追究今大統領親來督師諸君如能用命以我現在之衆當敵軍數營可
決必勝乃畫五路進攻之策分配各標營授以方略二十六日於華陰東門外集合悉將馬隊改爲步隊
四面環立劉初居中誓師言吾省存亡在此一舉當同心戮力以摧強敵慷慨悲壯衆皆變色伯英並言
前次失敗之由與此次所應預防之點各將士咸唯唯聽命誓畢約九鐘許各標營即整隊出發伯英督
東南路劉初與劉世傑督中路分向潼關進展我軍既出趙個派人送信至云奉內閣電北京與湖北正
在議和令約兩軍暫行停戰以待後命云云劉初疑其有詐因於二十七日午後揮兵進攻各營隊異常
奮勇敵軍不支敗退城內我軍爭先登城前鋒多人爲敵大砲所中傷敵軍數百手持紅旗復由西門突
出猛撲我軍一時驚退時天色已晚因即收隊退回華陰及嶽鎮暫事休息是役也我軍分五路進兵東
南原各路迂而遠未及趕到中路直而近接戰較早敵又傾全力對我故戰事劇烈死傷甚多二十九日
我仍以五路攻敵預定計畫先以佔據地勢爲要劉初與劉世傑仍當中路甫至泉店東即爲敵軍偵知
先以全力來撲遇於吊橋雙方激戰互有傷亡我軍卒以力單敗退華陰賴東南原及黃河岸諸軍據守
畫定地點牽制敵兵未敢來追三十日敵方以一營開吊橋欲撲華陰忽聞東原號哨聲起我東南原各
路一齊發動直搗關城敵以側面戰事劇烈急回軍往援詎料我軍猛不可當激戰至晚敵遂不支乃於
夜半潛退我軍於翌晨入城潼關復歸我軍掌握

是役也陳樹發所率係軍政部衛隊陳殿卿所率係大統領衛隊謝彩臣所率係馬玉貴衛隊劉世
傑亦帶自己之衛隊彈械既較充實官兵更多精強兼以劉初躬親督隊伯英詳察地勢首據要害各路
將士不惟皆能用命且具堅苦卓絕精神各營隊均於夜間露宿兵士忍飢受凍終無怨言故能一鼓作
氣克敵奏功事後趙個在南原遙望見我軍服裝部伍均極整齊顧謂瑞清曰你說陝軍是土匪今日

觀之士唯能如是耶及敗退後電報清廷有陝軍愈擊愈衆之語自此清廷亦不復輕視陝民軍矣

當潼關二次失守時陳柏生率衛隊百餘人井勿幕亦率新練數營並赴同州禦敵未及接戰潼關收復而西路又告急當是時山西民軍敗於娘子關清軍入太原閻都督百川退守大同溫副都督壽泉與我專使王一山率陝求援時河東道余某尙據運城爲清效忠柏生乃與勿幕議曰秦晉唇齒由來久矣晉若不守秦亦難安今晉之民軍求援不可卻也乃合兵井新招嚴飛龍之衆於十一月十一日渡河東征飛龍者朝邑大俠也與民黨同志夙有聯絡勿幕諸人至同州嚴即率其部衆來助斯時同陳井東渡軍容旣壯紀律又嚴甫過河即克運城而晉省同志李岐山等亦率敗卒陸續前來相聚於運城共圖恢復焉

伯英之初出潼關也豫西同志劉鎮華等聯袂西來並招夙結各豪俠投效我軍最先到者有丁同聲後又有王天縱是時潼關二次復收又突增健卒數千及各大俠之聲勢伯英復主東征因西路戰爭正在危急翔初旋即回省並調各標營急赴西路增援東路軍務仍付伯英主持迨十月以內西路戰爭稍穩伯英遂於十一月初旬東進連戰皆捷敵軍節節後退陳井之軍又於是時攻下運城風聲所至敵乃拔營遠遁二十一日我軍進佔觀音堂澗池等處與陳井軍隔河成犄角之勢省垣諸人以爲東方從茲可以無事矣不意清廷復派第六鎮協同毅軍共兩萬餘人三次窺陝我軍初失利於觀音堂退守硤石布置未定敵軍馬隊已繞道至我軍後方我軍退守張茅不及遂大敗陳井之軍又急切不能渡河二十八九兩日遂在茅津平陸各處與敵隔河遙擊十二月初二日陳樹發與敵戰於牛頭原李仲三與敵戰於七里店均以衆寡懸殊不支而退伯英走入南山潼關遂復失守

當清軍三次西來潼關危急時省垣大兵皆開赴西路防禦甘軍及接伯英請援之函實已無兵可

出適湖北幾度來電謂上海和議頗有構成希望各省暫宜停戰等語因即抄錄電文覆伯英令派人與清軍交涉遵約停戰伯英覆書極言敵軍情勢與和議之不可恃語殊憤激省垣得書大震其時在西安者僅吳華堂之先鋒隊不滿二百人及薛正清爲曹印侯新募之敢死軍三百餘人且皆徒手郭希仁商之党自新爲搜發土槍若干枝促吳都督世昌率之東行初三日早起程是晚伯英敗走南山之消息即至又聞陳樹發奔高陵收潰卒東路無一兵抵禦同人驚愕計無所出或言敵人來勢甚盛省城不可守不如速赴南山連絡鄂軍再圖恢復郭希仁彭仲翔諸人力持不可急令臨渭二華各縣官紳督率民團沿南山及渭河岸擇要分紮多張旗幟設大鼓爲疑兵並於赤水等處開挖長塹以備防守及調西路援兵漸回乃令陳殿卿李長蘭各以所部先開張聚庭帶總務府衛隊百餘繼進初六日午後冒雪出發初九日達華州探知敵人並未西進吳都督前軍已進駐華陰各路潰卒復稍集合而黃河東西尙有陳井之軍數千伯英又由南山招來豫西之衆合之達萬餘人三面成犄角之形遂上函西安總部報告布防大要並謂只可堅守不宜輕挑釁端東路軍事遂入議和階段矣

當是時上海和議將屆告成而陝省不知張翔初既接吳華堂報告遂東出視師並刺探敵情得悉此次西來敵軍確有兩萬餘人不可輕視因與吳力主休戰議和而諸將中多有以城下之盟爲可恥者翔初乃於二十一日集衆會議陳樹發諸人咸欲一戰翔初乃曉以目前情勢暨西路戰事各情形衆始無言遂決定議和二十六八兩日派彭仲翔金和賡等五人爲代表與敵軍代表會於泉店簽定停戰條約旋居改歲元旦張彭諸人聯袂之潼與趙倜會面連日又得清帝退位孫總理讓袁世凱爲臨時總統各消息東路戰事遂告結束

先是滿清前陝甘總督升允以廢員居西安省垣反正時單身出奔甘肅中途接清庭電復起爲總

督陝甘兩省軍務兼程馳抵蘭州調集甘回各軍二十餘營立即東下使馬國仁率馬步隊千餘人爲前部進窺長武其時適因潼關二次失守我原定開赴西路守禦之五標各營惟石得勝一營於九月十三日西開其餘各營有調赴東路救援者又有在岐鳳一帶勦匪者均未能西進及潼關二次收復隨調鄧占雲苟占彪兩營赴長武增防苟營於九月二十七日先開鄧營繼之甫出省城接邠州自治會報告石軍於十月初一日戰敵覆沒長武失守總部得報發兵馬大都督張雲山決定親出督師適會黨回紫山自富平率千餘人來省投效因即選其精壯者八百人率之西行又調高陵王占雲游擊隊分道赴援西路防禦始稍有準備十二日張雲山至乾州鄧統領占雲楊統領樹棠敗甘軍於長武驅出陝境雲山遂進駐邠州時甘軍之東來者尙有崔正午一部由平涼取道涇隴以進圖我鳳翔我省垣總部以各軍分赴潼乾兩路已無隊伍可派副統領萬炳南自請出征於十月十九日率齊得功馬隊蒲坤山砲隊并衛隊十餘營大舉西發至鳳翔派兵分路隴寶邊敵數戰不利退守鳳翔涇隴遂陷於敵當我軍之攻長武也向紫山營最勇敢得力十七日遇敵於冉店橋前鋒已敗退矣向字營以數百人冒死衝鋒擊退敵人當晚又以四十餘人劫敵營寨敵人驚退數十里張雲山由是激賞之故分配前方一切供給時向營多於鄧營又因苟營日前入乾州時有搶掠商民情事深爲不滿捕其哨官胡某及此次巡哨不力之士兵數名欲斬以徇又凡遇五標兵弁退回邠州時輒收其馬匹行李而向營教練溫志超復以奉命向五標借槍二百支未遂揚言張都督將收五標軍裝致鄧營憤激欲以兵攻向經人調停而止旋懼雲山執法甚嚴凡敗退或違令者即斬不貸占雲遂於二十二日黎明率其衆千餘人譁變繞鳳寶入漢中我軍之留駐邠州者除向字營外僅有張南輝之巡防隊及新招之衆約三百人王占榮由高陵遣來之游擊隊約三百人彭泗海自甯州新來投效之數百人及砲馬等隊共計不滿三千槍枝不過七八百而升允復

以陸洪濤等十餘營之衆兵精械利來攻忽於二十三日又接潼關二次失守之信張雲山星夜匯省圖固根本以邠長軍務及行營關防委鄒子良暫代並面諭何春霖周華武等與子良會同辦理雲山走後何等與子良互爭榷柄號令不能齊一各營隊又多不服調遣二十六日與敵戰於冉店向營全營覆沒其他各營隊均潰散子良無法阻止退至乾州收隊防守賊信至省城雲山以東路方急人心惶恐未敢離城乃令四標統帶邱彥彪率部先行令其護理西路行營事務彥彪至咸陽逗留不進雲山親赴咸陽促之十一月初六日始到乾州後路各隊亦漸集時升允大隊與馬安良所部精銳十七營陸續東來初十日彥彪率各營八千人迎擊於蒿店及監軍鎮各營隊全潰彥彪連夜遁歸省南幸雲山在乾州親督衛隊數營登陴防禦晚間於城上設燈火並不時改變號音竟夜不息敵驚疑不敢逼城下越日潰隊及各路新募之兵漸集雲山資之固守待援而邠永一帶扼要地勢悉爲敵據矣

當潼關二次收復後張勳初回省時正值萬炳南由鳳翔屢書告急即欲出師往援未及發而監軍鎮我軍大敗乾州飛書請援乃派王榮鎮楊茹林等部及曹印侯之敢死軍援鳳翔勳初自率東路新回各軍與馬玉貴援乾州勳仲勳與胡筮僧率井勿幕之兵兩營亦隨之助戰十一月十二日出省十三日至醴泉與乾州約分三路攻敵北原各營張雲山由乾州當西路勳初當中路馬玉貴當東路十五十七連戰兩日均以三路未能聯絡一氣未獲大勝然戰況亦甚劇烈馬玉貴以數百人衝入敵營後援不繼被敵堵擊幾至覆沒玉貴誓死督隊臥地不肯退兵士感激復奮勇回戰敵兵亦未敢來追也二十三日勳初到土橋聞甘軍據三水（民國成立後改柘邑縣）及張河鎮即派胡筮僧取三水至則敵人已聞風退去二十六日集各軍攻張河與敵戰於第五村敵軍敗退我軍進追敵入鎮城防守未受大挫是時三水一帶雪深尺餘山路崎嶇人馬難行又兼大軍所至鄉民逃避一空雖有麥粟熟食難得兵士飢凍

其翔初乃於二十八日回醴泉又聞東路復緊急旋於臘月初二日回省留馬玉貴守醴泉初邪長之敵見我軍服裝隊伍多不整齊心頗輕之此次醴泉之役多係東路調回勁旅槍械充足臨陣奮勇兼以翔初以大軍出三路攻敵側背敵一時莫明我軍虛實遂亦轉攻爲守不敢輕出乾州一路頓呈和緩之像甘軍將領崔正午攻鳳翔急萬炳南退駐岐山留民團守城及援軍漸至炳南復駐進鳳翔十一月二十一日分三路攻敵不克王鎮海死焉而曹印侯又率敢死軍來增援炳南復出戰二十二日大敗敵軍於柳林舖崔軍遁歸汧陽由是不敢再窺鳳翔是役我軍之在鳳翔者王榮鎮楊蒲林及萬軍之毛岐山傅定安各部快槍均多獨印侯所部三千餘人咸持雜色土槍刀矛鋤等兵器遜各部遠甚然以印侯善於鼓勵將士臨陣皆能出死力往往徒手爭先奪取敵人槍械而歸故鳳城賴以保全者敢死軍之力居多焉甘軍攻乾州多日以城堅守固頗有傷亡乃分兵東趨醴泉先是潼關三次失守省城空虛張雲山乃率其衛隊回省命邱彥彪督各隊守醴泉使楊仁山駐南坊鎮堵敵軍南下要路玉貴去後甘軍屢窺南坊楊仁山連函彥彪請增派援兵彥彪不應南坊遂於十二月十二日失守同時甘軍張行志部又攻陷岐山從此敵兵南下無阻新歲正月初一日敵將陸洪濤率兵乘彥彪不備攻入醴泉彥彪倉皇退守咸陽陸洪濤率馬步兵二千餘人乘勝尾追直逼咸陽咸陽告急函日數至時東路已通和清帝已退位矣張翔初尙在華陰部署善後各事馬玉貴自省力疾赴涇陽守臨涇渡防敵東竄之路適吳世昌新自東路歸總部同人請其迅出禦敵吳以甫經回省兵士未及休息初有難色繼念咸陽距省甚近咸陽若失則省城必動搖乃慨然允行遂率先鋒隊與薛正清之敢死軍周寅斌之砲隊力疾出發初五日晚抵咸陽時敵已進紮咸陽北原初六日黎明下原來攻世昌倉卒出城禦敵飛彈中傷右腿軍士昇歸而各營隊均震搖紛退入城敵軍直撲城下聚伏北門外及西關廟宇中豫備攻城參謀劉幼賓急令人閉各

城門以上壘之飛書省城請援並與王榮鎮董雨祿薛正清諸人登城布置調大砲隊上城助守適吳善卿帶朱福勝衛隊百餘人及七標自西來援改守爲攻各營隊由城外抄敵左翼城內數百人出東門助之直搗敵人所在轟焚廟屋城上守軍呼聲雷震敵軍大懼相率退出吳善卿乘勢督各營隊奮勇追擊城上軍亦下城協助敵遂大敗我軍直追至原上斬獲達數百是役也強敵撲城主帥受傷卒能以少擊衆轉敗爲勝實爲東西兩路作戰以來未有之事即敵軍亦自認爲入陝以來第一次挫折且爲意料所不及也正月初七日劉幼賓恐敵軍再度下原來攻諸將商定三路攻敵以吳善卿董雨祿之衆當正北路由善卿指揮之李金成周文斌邱彥彪當東北路康棣華邱彥彪指揮之吳鎮南周寅斌當西北路翟富榮指揮之自晨出發激戰至午後雖細雨濛濛而我軍士氣終不少餒自下擊上節節得利敵軍自六日大挫後中懷懼怯一遇我軍進攻即行引退我軍追至雙兆附近歸店張驛之敵胆破心崩當晚即退歸醴泉惜我軍不及探悉未能窮追初六日之戰吳善卿最爲奮勇殺敵幼賓以吳世昌令派爲中路指揮本日午間接董雨祿報告我軍各部不相聯屬幼賓恐因此致敗乃改派善卿爲各路總指揮不聽命者以軍法從事會天晚雨大各軍紛紛還卻善卿往來力阻至氣竭聲嘶不能止乃獨率百餘人進追數里適劉世傑到咸陽有報告善卿被敵圍者世傑急派親衛馬隊數十人令報者作導馳往救援須臾善卿歸口噓不能出聲但以手指畫敵勢與諸軍不肯用命狀並連稱可惜好機會後又索鉛筆書示衆人曰敵已胆怯我軍不追致敵子藥車數輛安然逸去可惜可惜書畢已氣結神暈如失知覺問之食不食爲備湯水飲訖即令安臥衆復商議僉謂咸陽北原地勢重要敵軍雖退而不派兵據守恐敵復來非我有矣乃計劃乘敵新敗再出進攻初八日因復冒雨進兵吳善卿仍督北路任宏發督西北路唐棣華督東北路午後開至雙兆店張驛附近聞敵已遠遁暫令各營擇地駐紮初九日各路同到雙兆店張驛

時升允促馬安良圍攻乾州益急城內我軍力單不能出戰惟堅守以待援兵嗣聞省城六軍已至咸陽乃派人變服至咸陽請援適陳柏生率嚴飛龍嚴紀鵬各部已至三原來函約以初十日進攻醴泉陳樹發亦率部至咸陽乃撥田裕祥及炸彈隊令其率赴興平西北向乾屬薛祿鎮進發藉以牽制醴泉敵軍兼爲乾州聲援初十日店張各軍會議進攻吳善卿當先督戰任宏發任後路接應前隊直趨醴泉城下方欲攻城敵伏忽自澗後出彈如雨驟善卿登時陣亡後軍聞督隊官已死全軍動搖不聽指揮各自退卻不得已仍回店張驛屯紮初十日以後店張驛薛祿鎮兩處我軍皆未再出惟陳柏生自陝東村連日攻醴泉嚴飛龍爭先至城下中彈陣亡同人以乾州被圍日久擬請張翔初親來督隊解圍繼思清帝退位共和業已告成各省均早停戰陝省若與甘軍再戰實覺無謂且陝甘毗連漢回雜居戰愈久則仇怨愈深將來聯合更難爲力因議請藍田牛夢周及興平張曉山衡山昆仲往勸升允罷兵息民三先生者皆關中理學者儒向爲升允敬禮者也十九日三先生偕赴醴泉十八里舖晤升允至則乾州十八日與馬安良已有和約矣升允見牛張來亦願速和翔初亦自省至晤牛張致書升允約定二十四日會於興平至期翔初將行省城同人聞之恐有意外使人來阻止張雲山亦自乾州來函言不可往旋接升允函拒絕相見而罷嗣聞升允已於是日鷄鳴率軍北去矣西路戰事始告結束

人物紀傳次序

井勿幕	錢鼎	郭希仁	張鳳翽	張雲山	萬炳南	馬玉貴	張鈞	曹樹勛	陳樹藩
党仲昭	彭世安	張寶麟	張玉成	張光奎	張益謙	張身菴	井岳秀	景定成	張銑
吳星映	張維寅	焦冰	李異材	李良材	王欣	常白新	朱先照	茹欲立	李元鼎
宋元凱	楊銘源	樊毓秀	楊壽昌	張瑞璣	薛駿	曹位康	陳殿卿	向紫山	王榮鎮
劉剛才	郭錦鏞	劉世傑	吳世昌	嚴飛龍	陳樹發	邱彥彪	胡應文	馬耀羣	胡明貴
石玉山	胡振乾	王仲元	李雲峯	吳聘儒	彭泗海	張建有	鄒炳炎	馬文明	南兆豐
李鳴鳳	續桐溪	任尹	原斯健	趙丕衡	吳善卿	王克明	薛豫華	劉粹軒	胡文驥
雷恒炎	朱長春	尙鎮圭	陳同熙	師守道	柏惠民	寇遐	李仲三	王兆離	王玉汝
張師渠	陳同	劉淦	王樞	雷電	董雨麓	劉幼賓	惠象賢	韋虞	王銘丹
馬彥翀	柏堃	高明德	李培基	王一山	紀雨陽	薛炎	陳得貴	劉寶濂	楊鶴慶

井勿幕

井勿幕蒲城人少儻有大志清季遊學日本值總理組織同盟會首先加入奉命回陝組織支部爲西北革命基礎辛亥九月朔與新軍諸人起義西安任陝北安撫招討使胡笠僧岳西峯田潤初諸人皆隸麾下率部東援山西民軍渡河下運城事定首先裁兵以身率衆討袁護法各役均奔走各方爲策動後任關中道尹兼外交事宜嗣因陳樹藩附安福解散國會憤甚不事事日以詩酒自遣而陰與陝靖國軍通聲氣後以計給陳至渭北爲各軍擁戴任靖國軍總指揮馳赴各部撫慰協力討陳至興平南

仁村爲新投郭堅之陳部叛將李東材所害年三十一遺子女各一

錢定三

錢鼎字定三白河人保定陸軍學堂畢業充新軍一標一營隊官辛亥九月初一日陝軍首義率徒手兵百餘人首入西關收陸軍中學堂軍械入城奪軍裝局協攻滿城畫謀決策悉出其手西安光復被推爲秦隴復漢軍副大統領建議以兵守潼關遏清軍西來之路且自請行時省垣初定軍令未一撥派營隊未能隨時出發僅率護衛二十餘人暨軍裝車數輛先發初八日至臨潼部隊仍未至適陸軍學生張世瑗等自省歸乃與臨紳曹印侯等議以所提民團授世瑗率取渭南渭南令楊調元先召渭北刀客嚴紀鵬之衆數百人入城據守世瑗至曉以大義楊令即開城降馳書告捷鼎遂於十一日下午至渭南嚴衆在西關列隊迎入見鼎人少意甚輕之且涎其軍裝頓萌欲奪之念武進士韓某楊令所持以招團守城者也固識革命意義省垣反正心固非之至是乃煽惑嚴衆謀於夜半圖之楊令見禍機已伏倉皇投井死韓等因藉爲口實鼓煽生變而鼎不知也方使人召集士紳商善後遽聞變作急與左右登屋彈壓無效而從者數十人多死乃偕弟國寶衝出越城而下陷泥淖中爲賊追及遂遇害從者有臨潼劉鎮嶽張世瑗四川余隆勳余國楨渭南白霞仙邵陽楊元楨馬緒洛陳清和等皆死焉鼎有文學口辯十餘歲入高等學堂肄業嘗作感時詩有顧瞻禹跡陸沉象劍作龍吟皆欲裂之句耆宿見者咸驚異之後益肆力於兵學嘗北游燕趙津沽膠州青島南至瀝濱波楊子江達杭州灣察形勢訪豪傑海內僑流悉與納交西北革命系統有三一爲陸軍學會一爲同盟會陝支部一爲哥老會而哥老會黨徒徧佈下層社會與軍伍中勢力尤強鼎早年即入哥老會後復加入同盟會以故西北革命勢力合流事前溝通聯絡

鼎力居多及武昌事起陝軍亟謀響應開會定謀恒視鼎一言爲重平時推重張鳳翽謂足以肩荷大任故力辭大統領職而自請守關當一面子身東行遂及於難無子以族子爲嗣事定軍政府以副統領請卹入祀忠義祠弟乙培畢業陝西陸軍小學常慕李秀成石達開之爲人以民族英雄自期清宣統元年即蓄髮披肩際朋輩皆以錢長毛呼之旋考入武昌陸軍中學在鄂加入同盟會辛亥舉義隨黎總統元洪與清軍戰於漢陽不知所終

郭希仁

郭希仁臨潼人遜清舉人見清政腐敗國權喪失創立麗澤學社糾合同志提倡新知又辦聲鐸公社到處講演喚醒羣倫慨然有澄清之志嘗東遊日本與革命黨人聯絡加入同盟旋充陝諮議局局長激揚民氣守正不阿同盟會陝支部成立因井勿幕奔走各地運動不恒厥居代爲主持支部事務未幾被推爲陝西支部長辛亥起義任秦隴復漢軍總參贊兼綜民政當時政務組織文告書檄皆總其成調和會黨尤費心力及東西兩路戰事爆發後隨軍奔馳無役不與陝局既定潔身引退遍遊歐洲考察庶政著有歐洲遊記袁世凱帝制自爲以號稱屠伯之陸建章督陝逮捕黨人避居華下講學四方賢豪多歸之討袁逐陸陰持大計共和再造後歷任陝西水利局局長兼林務專員教育會紅十字會天足會各會長教育廳廳長各職未幾退閒家居貧病不能具醫藥當道屢贈鉅金悉拒不受卒年四十三子三家春振岳

張鳳翽

議兼一標一營營長與錢定三張伯英党自新諸人稱莫逆辛亥新軍起義被推爲臨時大統領攻破滿城復被舉爲秦隴復漢軍大統領共和告成任陝西都督陸建章督陝時奉調入京任將軍府將軍兼揚威將軍

張雲山

張雲山字鳳岡長安人清末入陶勤肅營當兵轉戰西寧新疆積功至都司後充陝西陸軍混成協司號官與西北革命黨人聯絡辛亥武昌事起即密會諸豪俊尅期舉事因於九月一日與張鳳翽錢鼎萬炳南諸人以全協入據西安攻破滿城被推爲兵馬都督督師防守乾州與甘回軍相持百餘日大小數百戰城無完堞死傷枕藉清帝遜位詔書至始各罷兵共和告成以光復功授陸軍中將補秦軍第一鎮統制後改第一師師長陸建章督陝忌其才改任陝北鎮守使不使列任以咯血舊疾卒年三十九無子以兄子鈞嗣

萬炳南

萬炳南湖北鄖西人清末來陝入陸軍混成協第一標三營充正目與張雲山錢定三等三十六人結盟密謀革命辛亥西安光復時以數十人攻佔滿城通華門被推爲秦隴復漢軍副大統領出守鳳翔與升允所率甘軍崔正五部拒戰凡四閱月共和告成奉命縮編所部以違命伏法年三十二

馬玉貴

馬玉貴字青山湖北省人初充陝西陸軍混成協一標三營正目與張雲山萬炳南諸人同爲會黨

巨子因張聚庭錢定三張仲仁加入革命組織發動新軍起義任總理糧餉大都督率部出援西路與升充甘軍戰於冉店諸軍敗潰獨禁所部不許退卻敵軍亦不敢追共和既建改任協統陸建章督陝後謝事遠遊見者不知其曾爲都督也

張 鈞

張鈞字伯英河南新安人保定陸軍學堂畢業初任陝西新軍混成旅隊官與錢定三黨自新劉伯明諸人運動革命聯絡哥老會黨共圖大舉辛亥九月朔與張翬初等首先入城奪軍裝局攻克滿城被推東路征討大都督出師潼關與清軍相持閩鄉靈寶間互有勝負時省垣接湖北電謂上海和議可成各省均宜停戰並因西路戰事正急無兵分援東路因抄電文示鈞令與東路派員交涉遵約停戰鈞覆書曰接來函可恨可憐陝東屏藩必壞於我而源於諸公也南省電文決不可恃十月二十一日停戰時毅軍取我潼關十一月十二日停戰期滿展限我軍不得知十三日攻靈寶十五日取靈城血戰三晝夜敵軍不堪其苦而退非遵約也鈞由靈進至陝州擬作防禦計劃適伯生來函言晉境無多事不日當令嚴孝全過河相助於是復變守爲進先鋒王天縱進至觀音堂據探報澠池敵人用十七營之力來攻我軍遂退礮石固守時洋人與停戰令皆到於是停戰兩日與清軍實行交涉清軍支吾答之繼則請派專使面商其實運兵河岸上並未稍停彼無先誠於茲可見幸被我方探知連夜退兵王天縱等恃勇不服僅退二十里駐守張茅鎮鈞連夜回陝州調七標二營接濟嚴孝全過河而清軍已圍攻張茅我兵戰敗棄槍而死於溝死於井死於敵彈者約三百人最痛心者軍使劉粹軒及隨從五六人往礮石議和遭敵毒害一人未歸是時鈞之部隊兵不過三營槍不過五百以之退守到谷敢雖海軍兵兩營亦足抵禦其

如兵無鬥志莫肯力守何七標二營令守關門敵來未戰即逃不得已退闔鄉次日又退潼關一日早敵攻潼關幸三十日陳樹發來一日晚李仲三來尙可支持一時然以兵器不利陳營退守東原李營一部東開勝敗不能逆觀赴晉請援兵已三派信使而救兵不至敵軍現臨城下危亡迫在旦夕君等尙持秦檜之議以誤陝民與我吾死有期矣死亦當爲厲鬼用儆辦事糊塗者君等好自爲之現我兵無子彈無餉乾即欲不退而物不我濟爲之奈何當此酷寒省來各兵軍裝齊備衣皮外套靴鞋俱美鈔之兵平時無衣戰時無彈餉糈不繼飢寒交集守硤石四晝夜得飲熱水一口者不過千分之五十耳且大雪焉能以力守之前後情況略爲述之鈔病重城危請吳都督速來接事爲禱否則毀壞不堪諸君並要防清兵得潼關窺省垣矣省方得書大震即命吳都督世昌率數百人馳赴華陰往援鈔亦於南山收合部衆重整軍容東路戰局始告穩定共和成任陝西第二鎮統制駐防二華潼關嗣爲陸建章所忌解兵東游七年任陝靖國軍副總司令和鈔之督師潼關時所部隊伍均由各標營配撥而來且非素練之兵指揮作戰諸事棘手僚佐中如富平党廷佐字佑卿華縣袁植字佐卿皆清末拔貢廷佐知兵而植能文鈔因使廷佐治軍使植爲記室由是武備文事均資其力鈔常謂人曰党袁二卿實余左右手也袁後任華縣知事党在靖國軍亦有勞焉

曹印侯

曹印侯名樹勳臨潼人少孤貧力農奉母年二十自悔失學從同邑包海涵受業晝夜鑽研不輟學爲文下筆奔放不羈無扞隔語入泮後每遇文會輒一日成數十藝見者嘖嘖歎爲異人光緒三十年富平張扶萬主講橫渠書院張本關中淹博士印侯得其指授學益大進遂博覽羣籍時王敬如講學里門

其學主程朱能貫穿新理印侯踵門委贄執弟子禮往來講論經年心大悟歸築土室顏曰逍遙洞寂古今中外賢哲遺著摘條手抄貼壁殆滿上下千古瑩然貫通印侯之學自是大定三十四年與郭希仁劉藹如賀紱之分門治學於西安麗澤館印侯鷄鳴起練體力張兩臂迴環擊柱聲震屋宇每深夜演說痛陳時事之艱人心之陷溺慷慨泣下聞者奮興宣統二年應選拔試北上自題小照寄友云天地盜完猶恨少虛空踏破尙求深江山河嶽開王霸怒馬神龍鑄鐵身潮翻宇宙風顛海日照中天月滿輪若問先生眞實像玻璃肚子金剛心可以想見其概矣是年八月各省二次請開國會秦舉印侯爲代表東南人士多薄視西北當會議時甲此乙彼日中不決印侯慨然曰此事無容辯駁之地請即向政府索我民權來若弗獲當各擲頭顱謝天下衆驚顧無一語然咸服其忱擊京師各報紙競爲標題轟傳九衢旣還聯合鄉民倡辦地方自治加入同盟會川蜀抗路事起入西安約同志組織革命軍密赴渭北招募道聞西安反正率鄉團入臨潼以應錢定三督師東出留印侯守臨潼錢至渭南遇害張伯英繼之潼關反正印侯爲籌糧三千石餉軍繼又入西安謀招河北壯士略甘寧謂我不搗彼彼必犯我勿寧先出以制之議未決會潼關失守伯英函招救援印侯飛書走使十數日得勝兵六千遊俠輕生仗義之徒悉歸之號敢死軍破產貸資籌萬金以具軍資自食粗糲務與士兵同甘苦潼關克復而甘軍東攻分道薄乾州鳳翔守兵單圍尤急印侯奉調二日夜馳抵鳳與甘軍血戰三十餘次率烏合之衆以土槍刀矛衝馳於快槍怒馬之間無一人畏卻者卒能保危城屏西陲使敵騎不得東竄厥功甚偉共和告成印侯首議裁兵時諸將新立功當事者難之印侯曰請自我始一朝遣散十餘營僅留正兵屯田兵各三營裁兵後即條舉陝西實業擬次第擴充而尤致力於涇渠之開鑿當局者忌其才終不令得志有所爲已乃悉令散其餘兵印侯遂專志經營商業自此欲以財權左右世界民國二年養疴漢口先是二次革命軍未起時黃克

強李協和諸公走書詣印侯約同舉義印侯既籌歸陝響應矣而以病未及行至是謀泄被捕入獄獄中上書旨詞壯烈既得釋會天熱舊疾增劇移住杭之西湖爲靜養計竟於二年十一月沒於韜光寺年三十二印侯貌豐下目熠熠射人行步趨快與人交握手出肺肝不合則推誠面責無瞻徇雖悍將莽夫一見無不傾心其學問自成一家議論思想均能抉破藩籬尤善領導後進自爲學約若干條其言皆雄肆奇關足以開拓心胸苟天假之年使持其說馳騁一世其成就豈可量哉

陳樹藩

陳樹藩字柏生安康人保定軍官學校畢業初任陝西新軍排長加入革命運動辛亥西安光復任東路節度使與井勿幕東援晉渡河下運城共和既建任陝西第四混成旅旅長

党仲昭

党仲昭字自新三原人保定陸軍學堂畢業初任陝新軍混成協砲營中隊隊長與錢定三張伯英劉伯明曹建安諸人加入同盟會組設武學社爲秘密機關辛亥西安光復與張伯英朱叙五郭錦鏞余永寬等各率數十人由南門入分兩路進佔軍裝局協攻滿城軍府既建任軍政司司長嗣改軍政司爲軍政部仍任部長陸建章督陝去職後復參與護國之役事定當局命爲陝北鎮守使辭不就家居不復出

彭世安

彭世安字仲翔原籍福建侯官父官陝西白水因占籍爲白水人幼時即有志光復考入保定陸軍

學堂留學日本加入同盟會歸爲陝新軍隊官辛亥秋被派爲京師會黨新軍代表聞西安義軍起聞遂馳歸任秦隴復漢軍大統領府參謀長靖國軍時任總部軍政廳長後隨馮子明旅出師潼關爲國民軍應援與鎮嵩軍戰於華陰陷敵遇害年四十三女子三人

張寶麟

張寶麟字仲仁紫陽人保定陸軍學堂畢業歸陝任新軍混成協隊官與錢定三張聚庭等運動新軍及會黨同志加入革命厥力最多辛亥起義與錢定三自西門入繳收陸軍學堂槍械進佔軍裝局協攻滿城省城既定出任南路宣撫使

張玉成

張玉成字益民石泉人初入陝新軍混成協第二標三營右隊充正兵加入小雁塔同盟爲三十六弟兄之一辛亥歲受錢定三張雲山命往漢南一帶聯絡會黨約期舉事西安光復任西路招撫使事定解職洪憲之役復在南鄭召集黨徒謀起兵爲北洋陸軍所捕殺年三十五

張光奎

張光奎字聚庭長安人性豪爽喜交遊入本省武備學堂畢業充新軍混成協隊官與張伯英彭仲翔党自新錢定三諸人入同盟會組織軍事研究社爲秘密機關辛亥光復任秦隴復漢軍大統領府參政兼東路籌餉大使共和告成任陝西實業司司長加授陸軍步兵上校創辦機器麵粉公司工藝製革等廠陸建章督陝時任全省清鄉會辦處事實厚力避株連陝人賴以保全者甚衆後遂屏事家居歷任

省當道皆聘爲顧問二十五年卒五十九夫人盧氏名慧卿初與相識其居在西關僻巷中諸黨人恒假室爲密謀地聚匪嘗被陷入獄盧奔走各方營救得脫民國既奠謂聚庭曰夙願既償宇內一家袍澤皆貴仕我輩其追隨馮夏陽乎無令人作膝蕩齒冷也見聞人即告曰此役良苦今復得見亦云幸矣功成身退古有明訓聞者躐之先聚庭十餘年卒亦巾幗之卓識也

張益謙

張益謙字靖清華陰人日本陸軍士官學校畢業結任陝西陸軍編成協一標教練兼三營營長與錢定三張伯英諸人密謀革命加入同盟會聯合會黨首建西安光復之軍府既建任參議處參議共和告成棄職居天津從事實業

張身菴

張身菴潼關人清武庠生曾任甘肅固原守備以親老辭官歸里因交仲翔張伯英入同盟會於西安書院開設商業研究所爲秘密機關辛亥九月初二日率商團助民軍進攻滿城衝鋒先登竟以身殉年四十七子國瑞

井岳秀

井岳秀字崧生蒲城人清武庠生性豪俠膽識過人鑒於清政府敗國勢阡危結納草澤游俠密謀革命聞同盟會總理組織同盟會資遣其弟勿幕東渡加入受任爲陝支部長辛亥之役率兵援晉收復河東移師防隴轉戰乾禮聞共和告成首建募兵之議縮編所部爲諸軍倡後在陝北鎮守使逾十年

陝北及蒙邊各股匪盟旗王公莫不傾心感戴相與水乳靖國時隱爲北方奧援黨人往來平津粵滬各地咸迂折出其途行旅資贖取給無缺以積勞卒於軍年六十五

景定成

景定成字梅九山西安邑人初肄業北大師範館派遣留學日本在東京加入同盟會充山西同盟分會評議長戊申返國來陝任西安高等大學堂教習與邵力子李仲特郭希仁諸人密相結助井勿慕創辦陝西同盟分會夫人閻玉青仲弟敬之均預其事辛亥組織國風日報於北京鼓吹民主政治陰倡革命武昌起義後充山西軍政府政事部長聞吳祿貞被刺石家莊即偕史可軒姚太素運動吳部載回吳所截留北軍之槍械於太原清兵逼娘子關乃隨民軍南下聯絡秦軍收復河東民國建元選衆議院議員袁世凱謀帝制復來秦中策動西北同志討袁爲陝督陸建章拘捕檻送北京繫獄袁死始獲自由護法之役隨國會南遷入粵嗣復往來南北參預國民軍及北伐各役國民政府統一後寓居西安以著述自娛至今仍一老書生也

張銑

張銑字拜雲蒲城人清末以舉人選授耀州學政鑒於外侮迭乘清室腐敗留心獎拔改革人才旋棄職東遊日本與井勿幕諸人加入同盟會奉總理密命歸陝担任西北革命工作嘗至甘肅新疆伊犁各地鼓吹宣傳結識豪俊聯合同志組織教育總會於西安推設各縣分會並爲秘密機關又於同州倡辦求友學堂西安倡辦健本學堂公益書局與同縣李仲特王子端常銘卿富平焦子靜師子敬諸人從事文化革新運動爲入手方法又上書富道倡修西潼鐵路密聯比國某公司購運槍彈招募工程隊

相機舉事積勞過度因患咯血卒年四十七嗣子光錫

吳星映

吳星映字寶三朝邑人清末以知縣候補湖北丁艱歸里因見清庭腐敗絕意仕途寓居省垣與蒲城張拜雲富平焦子靜諸人合資組設公益書局爲秘密運動革命機關嘗聯合陝紳上書郵傳部爭西潼鐵路改歸商辦並創辦延長石油公司及健本學堂謀從文化實業入手進行革命辛亥光復任軍府參議歷任常道皆以革命先進推崇之年六十卒於家

維寅

維寅字東白蒲城人清光緒甲午科舉人爲人落拓不羈嘗爲南山某縣教諭見清政不綱外侮迭乘知非改絃更張不足救國遂棄官歸里旋被聘充省立師範學堂教習與同縣張拜雲并崧生常銘卿王子端富平焦子靜等深相結納加入同盟會從事秘密工作生性豁達善於詞令每當宣傳革命時援古證今高談雄辯滔滔不絕爲文自出杼機不循故轍詰經解書亦不墨守舊說而妙語創解時復驚人尤工書畫寸縑尺楮人爭寶之民國奠定後敝屣榮利澹泊自甘軍政各界爭相迎致得其一至爲榮十一年卒於家年六十九西北諸黨人莫不尊爲革命先進云一子曹永

焦冰

焦冰字子靜富平人父爲按察司吏員清末隨父讀書西安性慷慨好交遊見清室不振外交失敗慨然有改革之志蒲城張拜雲朝邑吳寶三皆器重之介紹入同盟會合資創設公益書局爲秘密革命

機關又與井勿幕王子淵等密囑李襄初諸同志創辦健木學堂培養青年爲革命幹部辛亥光復任渭北民團伍招合游俠保衛地方民國建元被選衆議院議員親率所部參預討袁護國各役旋爲陳樹藩所忌棄兵東遊及隨陳安福加入督軍團解散國會復歸陝與高峻在白水獨立實爲陝靖國軍之先導直皖戰後復至京拒絕曹錕賄選南至滬滇與唐少川唐冀慶相友善南政府七總裁時嘗爲雲南駐粵代表國民軍解散後歸陝染疾病廢於家

李異材

李異材字仲特蒲城人清邑廩庠生性剛毅有卓識繼業三原宏道學堂精算術著開方數理二卷及九乘方廉隅各圖應聘關中大學堂算術教習與邵力子井勿幕景梅九諸同志深相結從事革命秘密宣傳又同焦子靜王志端常銘卿諸人創設健木學堂培養革命幹部人才辛亥起義時贊襄軍事多所建自共和既奠以政府諸人類無遠略杜門不出歷任當道皆以顧問諮議禮聘之年七十九卒於家嗣子博

李良材

李良材字桐軒華材之弟也清季與同邑張拜雲等組織求友社以科學教授諸生被舉陝諮議局副局長遇事據理力爭人多折服夙與黎黃陂有舊陝軍起義時聞關赴鄂往與聯絡幾瀕於危民元充全國讀音統一會會員創定國音字母後致力於社會教育多年壽終於家年七十三子三人長博出嗣其兄仲特次協次隼

王欣

王欣字子端蒲城人清廩貢生與同縣張拜雲井勿幕富平焦子靜等交最善加入同盟會創辦健本學堂於西安自任校長以培養革命基本人才爲務又與臨潼郭希仁等組設麗澤館聯合同人不時聚會皆爲秘密機關辛亥光復任秦軍總部參議贊襄軍政一切共合告成潔身引退歷任當道皆聘爲顧問諮議以革命先進推崇之今猶健存年已七十餘矣

常自新

常自新字銘卿蒲城人清表入同盟會從事秘密運動曾任本縣高小學堂教員鼓吹革命異常激烈爲縣令李體仁所拘嚴刑鞠訊庭笞數百血肉狼藉始終不屈後仍與李仲特王子端諸同志創設健本學堂培植革命基本人材光復後歷任都督署秘書教育司次長各職末幾引退鄉居不復與聞時政後以事他出過洛河失足溺水卒年三十四子三天序天同天同

朱先照

朱先照字漱芳晚號佛光三原人遜清舉人自謂柔出明秦王後裔弱冠設帳授徒即以種族思想啓迪及門鑒於甲午戰後國勢日衰創設勵志學齋廣購科學書籍及新聞報紙以開風氣聞總理創立同盟會勸其門下諸子先後加入故辛亥以前西北主持革命者皆推爲革命先進入民國後年事已高當道以顧問名義遵禮之及陳樹藩附安福乃怫然曰吾不能教孺升木助長內亂矣遂不辭而歸靖

國軍時猶日以革命大義鼓舞諸軍年七十一以壽終一子早卒孫男自強

茹欲立

茹欲立字卓亭涇陽人畢業宏道高等學堂留學日本加入同盟會辛亥光復任秦隴復漢軍總部秘書長

李元鼎

李元鼎字子逸蒲城人三原宏道高等學堂畢業留學日本加入中國同盟會辛亥光復歷任秦隴復漢軍總部秘書教育司司長各職

宋元愷

宋元愷字相臣耀縣人宏道學堂畢業入日本陸軍振武學校首加入同盟會歸充本省農業學堂教員倡導諸生密謀革命辛亥西安光復時以辦理南鄉土匪戕殺外籍教士案得法被推爲外交司長兼醫院院長後復親統炸彈隊與升允軍戰於醴泉共和既建改任交通司長交通司旋廢仍赴日本留學值總理重組中華革命黨於東京受任爲陝支部長護國護法各役皆居中策動後因復辟事起親統郭堅康子定之衆數千人渡河北伐轉戰晉南經月失利自殺年三十八

楊銘源

楊銘源字西堂宜君人少有文彩爲沈淇泉學使所賞拔肄業三原宏道學堂旋送日本留學見清

政不綱強隣環逼知非革命不足以救國集合同志組織夏聲報鼓吹新印倡導羣倫歸國後與張伯英鄒子良張繼初井勿幕井崧生諸人秘密往來籌計大事辛亥起義任東路都督張伯英總參謀與清軍相持於潼關月餘民國建元被推爲臨時省議會議長國會初開被選爲衆議院議員後見忌於袁世凱遂遭不測衆院解散後東渡扶桑南走嶺嶠出席非常會議感染濕疾後任陝西省教育廳長數月旋赴北京就醫歿於德國醫院年四十五子汝民

樊毓秀

樊毓秀字靈山耀縣人肄業三原宏道學堂以春秋九世復讐之義倡導同人密謀革命爲當事所覺黜發憤南遊卒業南洋公學數學專科歸與井勿幕胡定伯諸人於本縣密組同盟會西北之有同盟會自此始辛亥九月西安光復時聚衆數千人於城外藥王山爲遙應旋奉檄率衆往助張雲山於乾州兼程赴援屢挫敵鋒克保危城共和告成乃赴日本留學後因復辟事起隨宋元凱渡河北伐兵敗晉南被執不屈遇害年三十三

楊壽昌

楊壽昌字仁天藍田人受業牛夢周之門辛亥陝西光復任曹印侯敢死軍標統與敵戰於醴泉之甘河逐陸之役尤爲奔走盡力靖國軍時歷任第三路隊長副官長後任監察院委員遇敵機受傷卒年六十子大乾永乾遠乾篤乾振乾

張瑞璣

張瑞璣字衡玉山西趙城人清末以進士授知縣分發陝西歷署韓城興平長安臨潼咸寧各縣事有強項之目與黨人景梅九郭希仁等過從甚密加入同盟辛亥西安光復代行民政府職務繼管銓叙局調停哥老會黨片言警解莫不悅服蓋其平日政聲得人信仰如此共和既建辭歸太原晉當局延長山西財政檢校出入利弊釐然震世凱以山西省長屬之未幾即辭去旋被選爲參議院議員後遂絕意政事居家數年卒年五十六子爾公

薛駿

薛駿字麟伯華縣人清季留學日本入同盟會回陝後充西安健本學堂校長並於省城設立正誼書局爲黨人秘密集合機關辛亥陝軍起義時齎軍府密函間關赴鄂籌辦械彈並爲秦鄂互助計商請鄂督於老河口設兩省交通處藉通南北消息共和成立任陝西製革廠廠長督造軍用物品七年冬應靖國軍第一路函招赴鳳翔半道至興平爲人所殺年四十二子尙忠

曹位康

曹位康字建安原籍河南沁陽清季隨父來陝從三原范卓甫朱佛光兩先生讀書遂入三原庠考入陸軍小學堂升入保定陸軍速成班騎科畢業與諸同學密入同盟會歸陝任新軍馬隊隊長辛亥九月初一日與党仲昭張伯英諸同志入城奪軍裝局攻破滿城光復西安任西路安撫招討使以十餘騎略定鳳翔改任大統領府衛隊統領率部東援潼關西援醴泉與升允甘軍戰於張戶原共和告成歷

任騎兵團團長第二混成旅步兵第五團團長爲陸建章所忌編遣其衆僅使帶一營駐三原後復參預護國復辟各役靖國軍時爲陳樹藩所疑解其兵柄暴亡於西安年三十四

陳殿卿

陳殿卿湖北均州人性爽直識大體與張雲山萬炳南同爲哥老會黨人因錢定三諸人加入革命團體辛亥九月西安光復諸黨人會議軍裝局推舉正副大統領萬炳南等意見紛歧惟殿卿與李長蘭始終傾服張鳳翽及見諸人相爭角心殊非之因宣言於衆曰義軍甫起成敗尙未可知而諸君猶以權位自起紛爭甚非國家之福如再有以名位相爭者吾即先焚軍裝局而去會衆聞言始稍斂戢翌日吳世昌亦以大局未定當以事業爲重其他不足爭論爲言並由郭希仁張衡玉從中調停於是大衆意見消釋乃舉萬炳南爲副統領張雲山等爲各路大都督大局始定論者謂此次會議殿卿數言實爲有力初任秦隴復漢軍監軍出援東路二次收復潼關民國二年聞陸建章將來陝即謝事家居及諸軍先後裁撤人尤服其有先見云

向紫山

向紫山原籍湖北均州清末來陝寄居富平以哥老會黨牽涉繫獄辛亥西安義軍起在富黨人聚衆響應出紫山於獄推爲統領簡合徒衆得四千餘人赴省隸兵馬大都督張雲山部旋隨雲山西征禦清軍於邠州長武間以戈矛當火砲冉店橋一役猛勇克敵卒保西路當時所謂向字營獨能轉敗爲勝共和告成後因年老以兵屬同輩岳翰林自任都督府副官旋回湖北終老於家子二長名某次名華州

白狼竄陝時從軍往禦戰歿於黑龍口

王榮鎮

王榮鎮長安人爲人慷慨有膽略明事理初入新軍爲騎兵營正目因李仲三馬開臣胡笠僧加入革命團體聯合會黨共成辛亥光復之功任騎兵標統隨張伯英攻克潼關驅逐豫軍是爲潼關第一次收復旋因西路戰事亟調援鳳翔共和成改隸張雲山第一鎮陸建章時解兵家居十五年以事爲國民三軍所殺弟鎮海饒悍善戰初隨張雲山在乾州以事忤張回省適鳳翔戰亟乃率徒手數百人持雜色土槍百餘桿馳往赴援奮勇陷陣卒

劉剛才

劉剛才原籍湖北因經商來秦寄籍咸寧性慷慨好交遊喪屢其貲遂投入陝新軍爲成協充一標二營三連正目與張雲山萬炳南諸人加入三十六弟兄共謀革命辛亥九月陝軍舉義時擔任攻取巡撫衙門協攻滿城以功任秦隴復漢軍步兵第一標統帶官隨同張雲山禦清軍於乾州共和既建解職歸農後充充靖國軍第四路參議兼後方運糧官民十一年疾卒於洛陽軍次年四十二子永民

郭錦鏞

郭錦鏞河南新野人幼讀書應童子試不售棄文就武初入陝巡防隊充正目因見綠營腐敗改投新軍砲兵營與張雲山張伯英諸人相聯絡結爲三十六弟兄同謀革命辛亥陝軍起義親率砲兵數十名攻佔軍裝局以功任秦隴復漢軍軍令副都督兼步兵第三標統帶官率部東征與清軍戰於靈寶陝

州間常爲先鋒隊共和成任陝西第二師第一旅旅長後因年老解兵居洪憲改元復與同志密謀起兵討袁被陝督陸建章所殺年四十三

劉世傑

劉世傑字俊生河南南陽人幼讀書常慕李光弼之爲人來陝充巡防隊中旗正兵見綠營腐敗轉入新軍第一標一營充正兵與錢定三張雲山張聚庭諸人結爲三十六弟兄辛亥西安光復時率隊攻巡撫衙門收繳中營槍械協攻滿城以功任秦隴復漢軍軍令大都督出征潼關與清軍苦戰數月革命成功改任旅長旋解兵柄家居後充岳維峻南路軍第二旅旅長駐老河口以兵士鬪餉爲湖北某軍長所殺年五十六

吳世昌

吳世昌字華堂湖北鄖西人清末以貿易來陝與哥老會黨有連投入新軍與張雲山張伯英錢定三等三十六人秘密結盟共謀革命西安光復任秦隴復漢軍兵馬副都督東拒清軍於潼關相持月餘和議成復率部西援咸陽奮勇督戰右腿中敵彈負傷猶指揮不肯少卻共和既奠以功授陸軍少將解柄閒居閉門茹素二十餘年終老於家年六十八見者不知其曾爲叱咤風雲之人也子三紹遠鎮遠明遠

嚴飛龍

嚴飛龍朝邑人初爲俠於鄉里屢以事抗官軍嘗走匿甘肅辛亥九月革命軍起飛龍率其徒衆千

餘人屬井勿幕爲秦軍第六協第十標標統渡河克蓮城與敵戰於茅津渡臨陣勇敢不顧身東路議和復率部西援與甘軍戰於醴泉三日夜攻城先登亡於城下年二十八

陳樹發

陳樹發字雨亭紫陽縣人幼穎悟少習商於鄂有志軍旅投入本省新軍獲與同盟會同志交辛亥起義以胆略初任秦隴復漢軍大統領府軍政部次長尋改任秦省督都府軍政司次長東路招討使兼秦軍第一標標統治軍嚴明有聲鄰好義樂與士人交晚年流寓南鄭安康與人談國事譏切無所諱未幾竟爲仇家所害妾李氏及次子同罹難夫人馬氏寄居西安亦憂憤卒長子國安旋亦病卒

邱彥彪

邱彥彪原籍湖北江夏清季來陝僑居西安以武庠生充防營軍職入洪門會爲大龍頭宣統元年入同盟會與張伯英錢定三諸同志密謀革命辛亥起義任秦隴復漢軍第四標統領兼管省會城防事宜奉檄救援西路與升允所率甘軍戰於鳳雛岐山閱數月共和告成解兵閒居與同志創設秦鏡報社闡揚革命正義後爲陳樹藩所忌避地漢中爲駐軍張仲仁所害子子麟

胡應文

胡應文字定伯耀縣人性忼爽尙氣節與同縣宋相臣樊靈山諸人主張革命入同盟會即耀州城內所設商店爲機關聯合渭北各地豪傑爲舉事預備黨人往來者皆住其家辛亥九月初一日聞西安舉義立集數千人於藥王山爲響應旋任井勿幕部指揮東西戰役靡不從共和告成權同官縣知事二

年調署洵陽知事會有變兵過境攻城劫掠因率團警登陴守禦中彈殉職年二十八子一博學

馬耀羣

馬耀羣華陰人居鄉爲遊俠有大志辛亥九月聞西安舉義即招集壯士數百人聯合駐華陰巡防隊胡明貴潛入潼關驅逐清吏據關反正響應省成後奉檄西援乾醴有功任秦隴復漢軍營長陸建章督陝後卸職歸田十九年病歿於家年五十六子今餘

胡明貴

胡明貴富平人清陝西巡防營營長平時與哥老會黨有連辛亥九月初一日西安義軍起時明貴駐防華陰廟聞訊即召合華潼關豪傑健兒率部反正逐潼商道瑞清據關響應省城逾數日豫軍來攻而省垣因錢定三遇害渭南援兵久未集明貴率數百人與戰於潼關東原力竭被執越日遇害年六十潼關始陷於豫軍

石玉山

石玉山字鳳岐河南洛陽人初充河南陸軍一標二營正目因與同輩訐發隊官侵餉事被革遂來陝投入新軍騎兵營第三連加入張雲山哥老會又與錢定三萬炳南諸人結爲三十六弟兄辛亥起義時率隊由東門進攻滿城東北面以功任秦隴復漢軍騎兵第一團團長隨同萬炳南出守鳳翔與甘軍崔正午部激戰數月共和告成駐鳳練兵嗣以母老請假歸里病卒於家年三十九子平成

姚振乾

姚振乾同官人少任俠好交遊常以組織會黨興復漢族爲志於縣城設麵房招待黨人爲秘密機關辛亥九月西安義軍起即同本邑白喜糾合壯士數百人據縣城反正旋以所部屬北路招討使井勿幕奉令克復宜君中部洛川鄜州等縣事定釋兵練團保民後復參預討袁之役因不滿主將所爲卸事歸尋以疾卒

王仲元

王仲元長武人民國紀元前一年經同邑李龍山介紹入同盟會辛亥九月聞西安反正即與龍山據縣城爲遙應及省城派石得勝營來長武兵無紀律仲元與龍山獨負城防責而升允調固原提督張行志率清軍忽至雪夜襲城入仲元被執遇害龍山僅以身免

李雲峰

李雲峰字龍山長武人清邑庠生精技擊喜談兵與臨潼曹印侯郭希仁乾縣吳希真等相友善加入同盟於縣長一帶聯絡同志待時舉事聞西安反正即與邑人王仲元等張掛義旗迎秦隴復漢軍六營二營石得勝入城而謀西征而清軍升允率甘回軍忽至得勝遇害仲元被執雲峰逃至乾州復隨張雲山大軍禦清軍於冉店橋戰不利隻身赴省請援共和告成權華縣知事後復參預二次革命及護法靖國各戰役爲劉鎮華所殺年四十子武

吳聘儒

吳聘儒字希真乾縣人三原宏道學堂畢業留學日本得識總理入同盟會歸國後担任西北革命工作創設平民共濟會聯絡黨員二次革命起時在乾醴興武各縣號召羣衆謀大舉以餉彈缺乏失敗後復參加護法靖國各戰役旋解兵柄隻身東遊勞心過度十三年疾卒北平協和醫院年三十九子撫東

彭泗海

彭泗海甘肅海寧人幼力農以驟車運輸商貨往來秦隴間行俠義好結交辛亥初受張雲山命在平涼一帶聯合黨徒從事革命工作聞西安革命軍興即在海寧樹義旗爲響應號興漢軍旋奉檄調至乾州與升允所部甘回各軍戰勇敢先登人皆以猛司合呼之共和告成以功任陝西第一師第四團團長駐防邠州紀律嚴整慈祥愛民百姓稱之爲菩薩軍人嗣解兵家居五年護法軍復興受高峯五密命在海寧一帶聯絡同志及舊部謀起兵討袁事洩爲袁黨甘肅都督張廣建所殺年三十五

張建有

張建有河南南陽人初入本省巡防隊充什長後來陝入新軍第一標一營充正兵擢正目與錢定三張伯英等三十六人結盟密謀革命辛亥光復以攻滿城功任秦隴復漢軍騎兵第二團團長與清軍作戰潼關月餘共和告成駐防東路後率部堵剿白狼於柞水疾卒於軍年三十五子某

鄒炳炎

鄒炳炎字子良原籍甘肅寧州寓居三原嘗爲人傭隨主人子竊聽塾師教授輒能領悟且出新解塾師異之勸主人資之學數年應童子試得雋旋獲主人資助留學東瀛加入同盟會歸陝與南雪亭王瑞軒李肯堂李授洲孫伯衡王若泉諸同志於西安創辦女子小學提倡女子讀書放足聯絡會黨密謀革命辛亥西安光復之際組織敢死隊與民軍共破滿城爲兵馬大都督張雲山參謀長隨同西征與升允所統甘回各軍戰於乾州數月卒保名城既而辭職創辦模範新村於耀縣冀實現總理民生主義及二次革命失敗袁世凱遣軍四出雄藩大鎮次第誅夷國民黨人胥被禁錮當道承北庭意旨因執而殺之年三十

馬文明

馬文明字開臣長安人性忼爽急人之困不惜財物因鄒子良入同盟會父承床素以刊布通俗勸善書板爲事人皆稱爲馬善人家有書肆即以之爲秘密機關時舉郭希仁鄒子良李仲三諸人密計大事辛亥光復任秦隴復漢軍兵馬大督都張雲山參謀長隨軍駐守乾州與升允所率回軍馬安良部激戰數月運籌帷幄悉中機宜共和奠定又助郭希仁禁種鴉片肅清煙毒二次革命起奔走運動尤爲激烈當道承北庭意旨捕而殺之與鄒子良同時遇害年三十六子學援

南兆豐

南兆豐字雲亭興平人清邑庠生留學日本入警監學校加入同盟會歸國後創立私立女子學校

於縣城兼充邑令張瑞璣所倡辦之興平報藉以開通民智鼓吹革命辛亥西安光復歷任都督府參事
交通司司長南北統一任陝南觀察使後因通電反對帝制家宅被抄陳樹藩督陝後委署涇陽縣知事
靖國軍起三原即往與謀嘗由電話勸陳引咎議和安定陝局陳惡之令其駐涇旅長曾子才手刃殺之

李鳴鳳

李鳴鳳字岐山西安邑人少業儒不爲章句學喜讀孫吳兵書乙巳（清光緒三十一年）與同
志景梅九創辦通潤公刊爲革命機關加入同盟會嘗以事爲縣令拘係遂入陝在黨人馬開廷家與西
北諸同志訂約後又返太原入鐵路學校辛亥九月太原民軍起義自領一軍迎敵而娘子關爲清軍攻
破民軍棄太原鳴鳳率隊南行至洪洞與敵隘口之民軍合勢頗震擬由河津接聯秦軍繼聞秦軍下河
東乃率全軍攻取絳州殺清軍統領陳某進攻陽平焚關城身浴砲火者累月清軍外援至始退駐史村
里和告成率隊歸河東任旅長後與晉督不睦被陷入獄陸建章奇其才保釋之因隨陸入陝聞袁世凱
將稱帝走白水與曹俊甫謀舉義道經三原與鄧寶珊續西峯劉允丞董振五諸同志約期共舉復入省
說陸獨立見陸猶豫未決遂潛至富平收警察槍械旋聞袁死乃率偏師渡河攻破猗氏謀襲河東半道
中伏軍散復集餘衆入保中條山事定入京充陸軍部諮議後復入秦靖國軍興往來西安三原間爲陳
樹藩所殺年四十一子三長卓吾次健吾次某弟鳴鶴字九皋少遊秦隴入回軍馬安良部服役以善騎
身名後歸里鄉友人赴蒙古勸馬辛亥革命軍興招募多人爲響應任乃兄行軍都督馬隊統領共和成
改編輜重隊駐安邑舜帝廟墾廟前荒田百餘頃成沃壤二次革命時因鳴鳳被執入京遂放其衆經營
農商聞袁世凱稱帝乃收合舊部潛赴華遠連破十餘縣及袁死事平釋兵復營商業既而郭堅渡河人

多勸其遠過不聽遂爲河東道尹馬駿所捕殺年二十九

續桐溪

續桐溪字西峯山西崞縣人少跡弛讀書重實行常抱種族之痛陰結豪俊同盟會興首注籍焉清末遣同志徐翰文等往歸化包頭聯絡健兒舉事未成翰文死之辛亥之役嘗以衆據大同獨立而毅軍淮軍合力圍之相持五旬共和成立任山西巡警道袁世凱剪除晉黨人乃奮然投綏歸討袁之役張漢卿馮欽哉發難包頭欲迎致之同時北政府亦有密緝之令因走匿陝北府神間旋南下訪胡景翼劉允丞於富平見郭希仁於華下訂交焉各地豪傑均先後來會共圖陝事旋赴日本謁總理以出兵北方自任雲南義軍起復歸至滇見唐繼堯至川見熊克武皆於戰略有所建白及袁死國會復活始被舉爲參議會議員靖國軍時嘗至滇證唐繼堯派師援陝既而南北議和派充陝西劃界專使遂借以返陝居三原爲岳維峻策劃軍事既又贊胡景翼出師中原卒成驅曹之功晉之國民黨在北京者曰民社在太原者曰平民中學皆以君爲領袖豫局既大震岳維峻召鄧寶珊歸微行過君病榻君囑以宜速退守河北維峻卒不能用途有峭函之敗君疾革時告郭宗道曰同志自信太過鮮能統籌全局者故爲敵所乘雖然吾儕革命黨人也無退爲懈請以此意徬告之語不及私卒年四十七

任尹

任尹字師竹耀縣人清郡廩庠生從咸陽劉古愚先生於味經書院忼爽尙氣疾惡如讐與蒲城張拜雲相結識拜雲倡辦西潼鐵路舉爲書記因得徧交井勿幕郭希仁焦子靜暨諸黨人加入同盟會廣

大革命組織諸黨人在麗澤館開秘密會議商討進行方略決由運動新軍入手而新軍督練公所提調王毓江爲陝撫恩壽私人防範黨人甚嚴陳會亭倡議排去之而未得其隙尹挺身自任與甘聘莘計議調得王之劣跡多款聯絡軍界彭仲翔張聚庭等三十餘人具揭託諮議局轉諮恩撫查辦王遂罷官去諸黨人之在軍籍者始得以次超遷奠定辛亥首義之基省垣部署略定尹復與同志分途向外縣活躍因返耀縣壁劃一切爲州友孫壽朋偵悉顧無確據不能興大獄乃畱使其爪牙惡役名八毒者窺探其行動尹平日素惡若輩魚肉鄉民遇事屢懲創之若輩恨之刺骨辛亥二月初七日耀州城東藥王山過會八毒伺尹於醉後譏評時事得失之際猝尹仆地以刀斷其兩足復截其全體而死年三十七

原斯健

原斯健字象乾蒲城人肄業本縣高等小學堂志氣激昂抱負非常井勿幕李桐軒常明卿王子端諸同盟先進咸器重之民國紀元前四年因教育會與縣令李體仁衝突革命秘密洩洩與校長常銘卿同時被拘遭遇極刑當時斃命年十五事詳革命紀事中

趙丕衡

趙丕衡字規生藍田人初入西安府中學肄業意不悅逾年轉入陸軍小學則大喜未畢業值辛亥革命軍起聯合同志首先加入旋因西路告急調當局陳抵禦法奉派爲秦隴復漢軍西路前營總教練官至邠州與清軍遇獻兩路攻敵之策主將不能用冉店橋敗後歸省請援約同志練炸彈隊自任總教練兼右隊隊官與敵戰於乾州薛祿鎮建議攻敵糧秣所在地主將復不聽兵敗被圍憤極罵曰敗國事

者必貪兵畏死之徒也此後軍事可知矣遂同王幹臣晁孟俠任新齋率本隊士卒百餘人縱橫奮擊敵敵無算彈盡力竭被戕年二十九事定後入祀忠義祠子國琪

吳善卿

吳善卿字忠孚長安人清末陝西新軍混成旅成立應征充第一標三營左隊正兵拔升上士因錢定三加入革命組織辛亥舉義攻滿城有功升任三標二營營長後在乾醴與甘軍戰屢卻強敵奮不顧身竟於醴泉縣東郭外陣亡年二十五

王克明

王克明字俊德咸寧人少孤貧習割烹庚子八國聯軍入京議和後憤清政不繼棄業從戎選送陸軍將弁學堂充砲兵排長與張雲山井勿幕鄒子良等參加小雁塔會議辛亥西安起義首先奪軍裝局攻入滿城不忍多殺旋從張雲山西征充先鋒隊隊長與升允甘軍戰於冉店橋兵敗被圍自毀砲身突圍而出前阻懸崖躍而免雲山嘉其勇敢委任砲兵總指揮同守乾州十一月二十一日敵軍撲城置大砲於城北唐武則天陵居高臨下彈轟如雨集城危甚克明鼓勇登陴描準一發中敵砲口炸毀之敵軍大驚謂我軍大有人在急移餘砲去至今乾人稱之傳爲神砲共和成以功任砲兵團長改授步兵上校加少將銜論者謂西北大局定於一砲較之古人三箭定天山殆又過之卒年三十六

薩豫華

薛豫華字建侯咸寧人少讀書見新聞報紙中革命言論悅之考入本省陸軍小學畢業升入湖北陸軍中學畢業回省充新軍步兵排長與饒定三張雲山諸人深相結小雁塔會議時君年最少身最矮而所結合之潛勢力爲最大辛亥九月光復推湘人會黨首領余晉海爲第六標統帶而已副之克復滿城六標之力居多旋率一營從張雲山與升允軍戰於冉店橋中彈墮崖墜屍中得免共和成第六標縮編爲營隸炮兵團當局以余晉海年老令退休而以君任營長君謂六標功最大傷亡亦最多亟稱余勞不應置閒散乃以余爲營長而使君爲他營教練官君辭曰余統帶在危難時不肯捨去我則於太平時貪祿位以他就乎上舉義之途使充余營營附駐守乾州二年白狼竄陝攻乾州晉海與君分守西南兩門匪衆蠶擁登南城巷海死之君聞南門既陷晉海不知下落士兵有勸出西門逃者君曰營長生死不明且相約由北大街巷戰退何可背之乃率衆下城東進與匪遇戰至天明力竭被執大罵不屈而死年二十七遺腹女一其妻董氏撫之成年適壽縣孫元

劉粹軒

劉粹軒河南新蔡縣人文行卓然爲一時知名之士辛亥武昌首義河南爲清軍控制黨人志士無機可乘聞西安反正乃與劉鎮華楚賞齋王天縱等二十餘人聯袂西來參加東路作戰嗣聞南北議和雙方各令前防停戰而清軍第六鎮與趙倜毅軍猶屢攻潼關乃與張伯英商以秦軍專使名義直赴敵營交涉遵令停戰竟爲清軍所害

胡文驥

胡文驥字德卿三原世家子初隨父宦遊江浙後歸陝讀書宏道學堂值辛亥義軍起遂從戎充某部隊官與甘軍戰於乾州兵敗被俘清吏升允稔其家世欲釋之溫詞諭降文驥厲聲曰余實秦隴復漢軍隊官憤懣虜據我河山久思驅除爾夷狄之種罔識順逆我以漢族懿孫仗義而來早置死生於度外豈能屈膝犬羊哉允怒立命殺之至死神色自若罵不絕口年十八

雷恆焱

雷恆焱字崑山醴泉人本省陸軍中學堂畢業辛亥九月隨同新軍光復西安復隨張雲山部轉戰邠州長武間挺身往見升允於十八里舖告以清帝退位請罷兵息民爲允所殺投屍智井中未數日敵亦不戰而退矣

朱長春

朱長春字正宜長安人初以武庠生補陝西巡撫部院戈什後調甘督署供差聞陝西革命風潮日漲稱病假歸參加秘密團體革命軍起任秦隴復漢軍第四標先鋒隊總隊長與甘軍作戰乾醴間出奇制勝謀勇兼長當在甘時常爲甘督升允賞拔因告勇親往敵營求見升允言革命救國宗旨及大勢所歸請罷兵允怒使人釘死於醴泉東城門年三十六

尙鎮圭

尙鎮圭字殿特大荔人清末留學日本值總理創同盟會首先加入歸國後任同州師範學堂校長提倡民族主義騰起青年即學堂爲秘密機關聯合同志及各地豪俠密運軍火力圖光復民國建元

被選衆議院議員及國會被脅解散奔馳桂川滇出席非常會議聯絡本黨同志與北洋軍閥相抗衡
曹錕賄選後鬱憤成疾卒於家年四十九子四者交者多者炎者盡

陳同熙

陳同熙字會亭潼關人清光緒癸丑補行壬子併科舉人鑒於清政失馭外侮迭乘因赴日本留學
加入總理同盟會與臨潼郭希仁蒲城王子端常銘卿富平焦子靜師子敬諸人深相結民國紀元前
四年（清光緒三十四年）任蒲城高小學堂教員運動學生密謀革命九月二十四日蒲案發生時以
先期因事他出得免聞訊後星夜馳赴省垣呼籲各方激起全省學堂罷課風潮出常銘卿於獄嗣因考
職入京聯合軍界黨人上書諮政院黜陟新軍督練公所總辦王毓江陝籍軍人始得以次擢升要職卒
成光復之功民國建元被舉衆議院議員國會解散後留京有所運動因憤致疾卒於北京年三十六子
某

師守道

師守道字子敬富平人初與井勿幕井崧生張拜雲陳會亭諸人交最密加入同盟會拜雲與焦子
靜合資開設公益書局引爲經理主持革命秘密事宜辛亥光復後歷任三原縣知事陝西省銀行經理
國民軍時嘗任豫南道尹勤政愛民事必躬親獄無留滯陳會亭病歿北京後爲經紀歸其喪撫其子求
學至成立

柏惠民

柏惠民字筱餘涇陽人少讀書務觀大略討論古今興廢及中外大勢尤好閱新聞報章見清政日非外侮凌逼因讀黑奴籲天錄及總理小傳鐵券諸書遂入同盟會與同志組設勤公社於三原以提倡文化爲名實爲革命秘密機關民國紀元前一年邀集井勿幕宋相臣等十餘人就其家園草擬會章暨通信方法並與省方郭希仁等聯絡陝西同盟會支部遂以成立旋南遊至滬與宋漁父子右任陳英士譚人鳳諸公往還尤密嘗斥鉅金購置武器炸藥使人學製炸彈辛亥光復東西兩路作戰均資其力討袁之役復以家貲擔保訂購某國步槍萬餘支彈數十萬粒大砲四尊運陝作戰家本巨富因資助革命興辦地方教育及社會救濟事業先後不下數十萬金竟以此破其家陝人以財救國者推首出焉民國二十九年卒年五十三子紀會

李仲三

李仲三潼關人清邑庠生加入同盟會奔走運動聯絡朝邑刀俠嚴飛龍參加革命辛亥西安義軍起任東路安撫招討使與清軍戰於閿鄉靈寶間事定解兵靖國軍時常任渭北水利局長計劃引涇事宜後隨陝軍出關聯絡馮胡兩軍成首都革命之功段祺瑞執政時因金佛郎案挺身責撻安福系要人姚震爲當道所不容漫遊京滬及蘇聯十餘年歸國後一貧如洗三十二年被選爲省參議會議員

寇遐

寇遐字勝浮蒲城人本省師範學堂畢業清末任同州師範學堂教務加入同盟會與大荔尙殿特

及山西李秀諸人主持東路一帶革命運動事宜就學堂爲秘密機關陰結各豪俠響應辛亥西安光復討袁護法各役皆奔走各地爲策動後被選爲衆議院議員拒絕曹錕賄選國民軍時嘗任農商部總長

王兆離

王兆離字伯明扶風人受業於三原賀復齋咸陽劉古愚兩先生道德經濟爲鄉里所矜式旋領鄉西薦憤甲午庚子兩戰役清庭不振有志革命歷充西安鳳翔各中學教授常以滿漢種族問題詔諸生加入同盟會辛亥光復之際在西路各縣宣傳革命大義各界人士咸爲感動踴躍參加共和告成被選陝西第一屆省議會議員二年任第一屆國會衆議院議員與前國府主席林森過從甚密袁世凱謀帝擇道各省推選代表當道推君嚴詞拒絕七年出席廣州非常會議旋隨總理至滬參預密謀後以日制張勳醫北平拒絕曹錕賄選國民政府既建以其忠勤黨國年給養金特典也三十一年二月卒於家年七十有二憲周憲昭

王玉汝

王玉汝字誠齋扶風人巴西拔貢因見清政不綱有志改革邑令陳雲霖委辦團防欣然應命招軍訓練欲藉以爲舉事基本辛亥陝西革命軍起僱曹印侯敢死軍藥升允大軍於鳳翔鏖戰數月印侯另臥病軍事一以倚之民國成立主西路黨務五年因與諸黨人密謀討袁被陸建章逮捕入獄陸去袁死乃得釋歷任宜川扶風邠縣各縣長核實田賦蕩滌積弊政聲卓然靖國軍興主籌餉局軍食賴以不匱初從咸陽劉古愚先生學稱高足弟子居鄉教授俊傑之士如董振五史天士楊萬青等均出其門民十

二年卒於家年五十一子三瑞鸞早卒瑞鶴瑞鸞

張師渠

張師渠字仲良武功人清廩庠生性豪俠喜交遊知清室之不足與謀聞孫總理創立同盟會因加入與井勿幕諸同志往還甚密辛亥西安光復時奔走渭北運動各地豪傑響應省城西路戰事危急時嘗建選將禦敵之策討袁護法各役皆奔走各方爲之策動靖國軍興任吳希真左路第一支隊副司令嗣充駐川代表兼講武堂陝籍學生監督後任靖國軍紅十字會會長二十一年病歿於西安年六十五長子世安服務靖國軍第四路先鋒營從軍攻岐山陣亡次子崇林

陳同

陳同字素子浙江諸暨人沈靜多謀辛亥前一年來陝聯絡西北同盟份子及哥老會黨人密謀革命辛亥九月民軍起義充秦隴復漢軍副大統領萬炳南部參謀長事定解職漫遊靖國軍時嘗任總部軍務處處長後遂歸隱黃山二十一年卒於南

劉淦

劉淦字介夫富平人清末以廩庠生入三原宏道學堂畢業任健本學堂教習加入同盟會旋以優貢勦職直隸州州判分發甘肅有所運動民元任陝西省議會議議長歷任寶雞鎮巴各縣知事被舉衆議院議員後遂服務社會教育事業

王 經

王經字偉齋乾縣人清末爲健本學堂教員加入同盟會運動革命辛亥西安光復任秦隴復漢軍總部軍需處長討袁護國無役不與後雖歷任西安督署要職而廉潔自矢十八年陝西饑疫竟以絕食卒於西安年五十二

雷 電

雷電字季陽蒲城人性俠烈居鄉遇不平事輒加干涉讀書不求仕進見四川鄒容排滿書悅之加入同盟會與常銘卿井崧生諸人組織教育分會充書記聯合草野豪俠待機舉事擬以蒲城爲革命策源地時在民國紀元前四年（清光緒三十四年）重九夜親帶暗殺團員潛至巡警局欲殺縣紳張某不遂與縣令李體仁構隙因有二十四日捕拿教育會長常銘卿及學堂全體學生之事辛亥舉義時渭北各地民軍盪起季陽鼓動之力爲多嗣後護法靖國諸役皆奔走各方爲運動旋被陳樹藩繫獄年餘人皆稱爲老革命云又有蒲城劉養正字芳初寇重字孝庭常瀛字仙洲及原振之皆爲最早同盟會員與季陽同在教育會鼓吹革命從事社會教育畢生不懈後皆終老於家

董雨麓

董雨麓湖南人清廩庠生民國紀元前五年（清光緒三十三年）來陝任興學堂體道函習時遂加入同盟會西安光復時任秦隴復漢軍七標營長與清軍戰於咸陽共相戡解兵仍服務教育游隴灋牛皮筏游泳法十六年後歸里隱居音問遂絕

劉幼賓

劉幼賓河北省人保定陸軍學堂畢業派入陝西新軍混成旅見習擢遷排長辛亥九月朔隨同陝軍反正任秦隴復漢軍總部參謀初隨張雲山守乾縣及潼關三次失陷省垣大兵盡數開赴西路禦敵吳世昌僅率二百餘人東援進駐華陰幼賓爲行營參謀夜查城防畫治軍書文牒函件隨時批答毫無留滯身勞形瘁幾至失明東路和議成後復隨軍西援咸陽勞苦之狀一如在東路時事定翩然歸里音問遂疎矣

惠象賢

惠象賢字春波長安人清廩庠生選送關中大學堂畢業由井勿幕郭希仁介紹入同盟會與康寄遙惠甘亭等創設兩等小學於帝君廟鼓吹革命辛亥西安光復任軍府軍需及親衛隊管帶旋升總統和議成調署省會警察廳長兼警務處長陸建章督陝後解職任督署參議後辦菊林小學及救濟慈善事業卒於家年六十三子秉瑗

韋廣

韋廣字協度蒲城人清太肄業同州師範因寇勝浮馬彥紳諱卜五入同盟會辛亥反正任北路招討使井勿幕參謀勿幕援晉虞爲留守督同部衆馳援三水醴泉相機策應措置咸宜共和告成潔身引退護國靖國圍城各役皆身任各部要職解圍後任國民聯軍駐陝總司令部監察委員十八年積勞病卒年五十四子一靖生

王銘丹

王銘丹字敬如臨潼人當清末季嘗慨西北人情蔽塞守舊以開通風氣矯正時俗爲己任從專講演口若懸河聽者爲之動容渭南令張世英見而奇之延致幕中日與謀議推行新政旋與郭希仁曹印侯賀紱之諸人於省垣組設麗澤館講學其中實爲革命秘密機關辛亥起義任東路防禦大使共和成署麟縣知事卸事後病歿於家年五十二同隲有華縣李坤生乾縣李守先並以善講演聞時有陝西三大演說家之稱

馬彥翀

馬彥翀商縣人陝西高等學堂畢業任健本學堂教習因井勿幕李襄初入同盟會庚戌春與郭希仁焦子靜等十餘人在大雁塔會議後派赴日本密購軍火辛亥九月回至北京聞陝軍反正即約陳會亭范味腴諸人回陝行至澠池爲清軍所阻乃改由海道至南京謁孫大總統正當陝軍東西兩路戰事吃緊之時奉派與甘聘莘王鳳文赴鄂請援謁黎副總統元洪商派劉公季雨霖兩部爲援陝軍王甘東返彥翀偕輕騎西進抵荆紫關接電知清帝退位共和告成而罷民元被選爲衆議院議員

柏堃

伯堃字厚甫涇陽人清副貢生受業於賀復齋劉古愚兩先生研究經世致用之學以改造新中國爲己任辛亥革命時曾充學生隊隊長維持省城治安後爲實業司司長民國建元被選第一屆省議會

議員歷參討袁護國各役靖國軍興任總部財政處長及第四路秘書長出任富平縣知事卸事後家居數年以疾卒年六十子惠誠

高明德

高明德字又明涇陽人性沈靜有巧思因井勿幕入同盟會並介紹柏筱餘吳希真諸人加入革命團體以西北軍火無來源函商滬總會派技士溫自強來陝從溫學製炸彈又隨熊克武至滬專習製造無烟火藥及炸藥等辛亥西安反正任軍府軍械官就地取材製造地雷炸彈東西戰場均資其力陝黨人以製造軍火名者又明實首倡之

李培基

李培基字養初藍田人受業於牛夢周先生辛亥前入同盟會投甘省新軍周務學營學兵事辛亥陝西光復投敢死軍充隊官與敵戰於南坊甘河頗著功績護國之役運動尤力六年靖國軍興充三路營長敵犯關山與王祥生防禦清寺國民二軍時參馮子明軍後歸田年已六十餘矣

王一山

王一山洵陽人西安陸軍小學畢業因錢定三加入同盟會辛亥光復任秦隴復漢軍炸彈隊總隊長

紀雨暘

紀雨暘字時若富平人弱冠經商三原因讀民報鐵券諸革命宣傳書加入同盟會與同縣紀子文三原張立卿諸同志組織勤公社爲秘密機關辛亥起義任井勿幕部營長與清軍戰於三水勿幕東渡河時嘗兼代渭北安撫使職共合成解兵歸商駐滬數年與陳英士徐朗西諸人奔走討袁護法靖國各役二十年被選南京國民會議代表後遂奉佛家居卒年五十八子三天太義太佛太

薛炎

薛炎字正清韓城人清邑庠生因井勿幕郭希仁入同盟會辛亥光復任曹印侯敢死軍營長作戰鳳翔事定解職從事教育

陳得貴

陳得貴字海山渭南人夙爲哥老會黨徒中優秀份子初充本省新軍第一標二營正目因李仲三馬開臣胡笠僧入同盟會加入小雁塔秘密會議爲三十六弟兄之一會黨與同盟會黨人往來接洽恒涉得貴與王榮鐘兩人爲代表常到諮議局與郭希仁諸人商議機密辛亥起義之先又由兩黨同志派赴河東聯絡晉省會黨同志得其響應省垣反正後歷任秦隴復漢軍監軍團長東西兩路難賊均有功勞事定任陝西軍官學校校副官後復奔走討袁之役旋以母老謝事歸年尙不及三十

劉寶濂

劉寶濂字楚材洋縣人清末畢業上海南洋公學歸任陝西優級師範及西安府中學堂教習因井勿幕入同盟會辛亥西安反正時曾策動員生三百餘人助攻滿城並佔守西倉接濟軍食軍部始建被派管理郵政電報組織交通司倡議改驛歸郵開改良郵政之先聲嗣因交通司被裁乃辭職赴歐洲遊學專習機械探礦工程今且爲西北工程專家矣

楊鶴慶

楊鶴慶字叔吉華縣人肄業三原宏道學堂因讀鄒容革命軍及大義錄諸冊與同學張熙若曹俊夫等二十餘人組織學生自治會決心革命爲學堂監督偵知開除赴滬入理科專修學校畢業東渡日本因黃克強宋教仁入同盟會辛亥四月回陝贊助軍學紳界各黨人計劃革命進行方略九月一日西安反正襄助總部組織奉派接辦龍駒寨電務抵荆紫關沿途修復杆線陝鄂電報得以靈通東西兩路戰亟復助宋相臣編練炸彈隊任參謀親預醴泉戰役旋任二十二標一營管帶即由炸彈隊改編者也以紀律嚴整分駐四門城樓並担任鐘鼓樓軍政司省銀行富秦錢局各處防守職務共和告成編遣所部赴日留學初習探礦冶金嗣入醫科專門學校畢業歸國後服務本省陸軍醫院兼辦慈善救濟事業陝人士在醫界馳名者莫不推之爲巨擘焉

文獻彙存

半哭半笑樓詩集 三原于右任著 有印行本

辛亥從戎日記 臨潼郭希仁著 有印行本

常銘卿爲蒲案泣告同胞呼援書

秦隴復漢軍第二鎮戰記徵文啓事

郭希仁曹印侯胡笠僧 六先生碑誌傳狀集 扶風溫良儒纂輯 有印行本

常銘卿爲蒲案泣告同胞呼援書

蒲城縣高等小學堂管理員劉友仁選授教職赴任學生遂立自治規則稟俟至年終另舉蒲城知縣李體仁於九月初一日來學堂與諸生面談規則甚合望衆皆遵守爲妙並云若能如此一可不費公款二可緩覓安人學生即將所定規則呈請核鑒李亦無辭初十日劣生蘇民章冉澍等以謀充管理不遂挾忿誣控略云教習唆使學生自治以固祿位學生博歡教習圖積多分率屬拉雜無據之言李批云稟如果實教習學生均欠文明著將稟批抄錄傳示學堂兩教習常自新陳同熙即行函辭李亦不覆十三日教習搬去行李學生守候二日無可受課後具稟辯誣言多項撞李令閱稟大怒亦疑出自常手遂於本日下午差役數名手持蒲城縣正堂封條竟將奉旨設立之小學堂用交叉封條封禁多數學生皆從操場逃出暫寓北街關帝廟尙望官威少霽仍可回堂先是本縣教育分會廚役某恒夜出不歸致屢

被竊月之某日晚該役又不言而去適被書記雷電窺見尾偵所向乃至巡警局賭博蓋與縣署轎班合開之賭博場也雷即喝罵廚役亦逃拿獲賭具亂錢回會會長常自新現充高等小學堂教習長不在會次日始知責其越界拿賭實屬不合然已勢成騎虎只得面請李令懲辦李羞惱成怒捏稟學司以教育會不應多事且所拿者乃整錢非亂錢乃飯碗非骰盆余學司亦不詳查只批將滋事之人嚴拿懲辦李令遂得兵符于二十二日下午親領健役二百餘名各持器械槍砲封四門行回捕房直至教育會將舉人常自新親手拉出左右批席務常瀛勤學員李九標門夫杜姓全數鎖拿旋去廟北廟門不開喝令差役越牆啓門至上殿破扉而入亂打亂鎖甚至十二三歲之小學生皆全數被縛得勝回衙高坐堂皇將本縣舉人教育會會長學堂教習常自新痛責數百其餘會員學生皆鞭批二百答三百五百不等無一能免一時血肉橫飛號哭震天亂髮被面臉血模糊用刑既畢即飭拘押械繫在東西黑卡上舉人常自新與盜賊同押晚間繫以大練繩即鳴鑼街市令差役喝叫凡在教育會者速遞悔詞恐非誣與大不能快意教習潼關舉人陳同熙乘隙宵遁逃進省城教育會演說員寇重慶及一漏網學生先後到省獄各報告教育總會總會已派員往查咨呈各大憲矣會長面稟學司言即寄李令一函勿得胡鬧云云當李令之稟教育會越界拿賭也余提學司不但不察其真僞且有推波助瀾之詞痛詆常教習而贊美李令之能幹李又稟稱教員不合應即暫停一個月冉蘇誣訐之詞既不詢其是否實情又不查其課本積分之數但謂李令抄批送學堂閱看並無不合而不問其即轟逐教習之舉動也蒲城學務萌蘖之生由於徐署令普苦心經營甫及兩年橫被摧殘慘無人理是誰之過歟現時常與學生均爲囚徒其誣興大獄亦在意中而省城各學堂人心洶懼以爲嗣後尙敢讀書充當教員乎昨日開會集議有痛哭者合座無不流涕其演說均有云縣令之威如此則提學司可知舉人如此則他教員可知學生如此

則平民可知奉旨設立之高等小學堂如此則藝門圭竇可知奉旨已停刊訃之後如此則以先可知悲哉痛哉陝人其終有遺囑乎陝西一沙粒泣啓

秦隴復漢軍第一鎮戰記徵文啟事

東亞之大陸磅礪鬱積久而一發最神速最偉大上下五千年所未聞東西數十國所未有者非中國之革命乎江漢之滄首以義聲爲海內倡關中豪俊急起直追百二關河指日光復東通豫晉南聯川鄂西禦甘隴大小數百戰奔馳千餘里迂互五六月死傷數萬衆將校堅忍耐勞士卒爭先恐後義俠響應景從民衆戮力一心終能式遏強寇保界河山以弼成我文明神聖惟一之共和大民國轟轟戎洋哉吾秦戰事之在中華民國革命歷史上之位置價值洵乎其無二上也今以我同胞拋擲無量數之腦血心血頸血贏得此後永永無極之幸福完完全全付之吾儕而顧忍聽其淹忽隨物化淪胥以終古乎秦人素不喜事鋪張致璀璨光華之事蹟瑰奇雄偉之人物不得與河聲嶽色並有千古已足惜矣自共和成立臨時政府屢徵革命戰史兩月以來粗有端倪用特設史局專職斯役惟是案牘書函率多疏漏戰士戰術缺焉不詳至於個人行實地方情況亦未由悉知非周諮博訪湮埋者正復無限如有親履戎行目覩戰况或編入日記或次爲傳略或叙一事之顛末或述一方之梗概體不可略事取徵實所望隨時寄達以匡不逮庶幾英雄壽世峙銅像之巍峨載籍生光長石室之聲價諸君子倘亦樂於從事乎

西北革命史徵